

敬業堂詩集

冊八

敬業堂詩集卷三十六目錄

道院集

重寓城南道院

疊前韻與同年賀集洲沈岱瞻家東

亭時三子皆同寓

小憩一莖菴與靜章上人

寄祝竹垞先生八十壽二首

趙价人乞東籬詩戲贈

題同年詹允繩小照二首

秀野草堂圖歌次顧十一俠君原韻

椿樹草堂月下分韻得侵字

初伏日集張天門前輩寓齋暑甚晚

雨微涼

曉仙謠效温飛卿體

天門席上分賦宣窰盤中果物余得文官果限官字

長林豐草吾廬圖爲林鹿原賦

李簣齋招集聖安寺納涼得火字

陳月瀧太常蘭竹艸蟲畫二首

白沙翠竹石江圖爲吉水宗伯李公

賦六首

分咏京師古蹟得貫休畫應夢羅漢

像

雨中蔣青棠孝廉邀集城南張園用

南字

夏日咏物分得青奴

次韻答周漁璜前輩見寄

以蜜漬鮮荔枝二枚分餉漁璜前輩

蒙示絕句二章次韻戲答

立秋日陳南麓都諫招集桂雲書屋

匡山讀書圖歌爲南麓都諫賦

分咏詩人居址得東坡

牛鳴雙村棹歌爲郭于宮賦四首

七月十四夜寓樓對月

題恬菴上人匡廬訪道圖二首

七月十五夜陳六謙過寓庭月下小

飲

題史耕岩前輩溧陽溪山圖卽次原

韻四首

題邵甘來匯水村居圖

初遊城南陶然亭

種藤歌爲周桐埜前輩賦

德尹請假出都志別八首

孫觀河無隱室乞題詩

座主相國澤州公有別墅在西苑旁政事之暇間一憩焉因取唐人郎士

元詩意名曰半日村高咏成篇命余繼和恭賦一章時長至前二日

紫滄同年出示百聲詩凡天壤間有聲之物無不入其牢籠和之不勝和

也冬至日獨直西苑心有所會偶拈四題兼寄靈隱諦輝高旻湘兩

禪師亦屬並和

冬夜集潛齋分韻

冬夜讀亡友錢木菴詩中有咏塵咏影二首嘆其學道有得追和原韻

十二月初五夜夢一僧叩門乞詩夢中了了作四言八句覺而錄之

謝院長餉白魚牛尾狸

院長疊前韻見貽追憶十六年前唐

東江與余晨夕唱酬事再疊韻奉答

次日復惠黃柑冰鮮兼來索詩再賦二首

鑿冰詞

次韻答李秦川

題劉若干前輩夜雨對床圖小照

送勞介巖副憲歸里

敬業堂詩集卷三十六目錄

...

...

...

...

...

...

...

...

...

...

...

...

敬業堂詩集卷三十六

海寧 查慎行 梅餘

道院集 起戊子五月 終十二月

余自甲申以後僦居城南道院者三年今春寓直西郊五月 駕幸山莊

避暑余仍回舊寓時同年賀集洲沈岱瞻及家弟東亭俱需次入都樂數

晨夕遂定居焉安知後人不指此為浙西道院乎

重寓城南道院

壞壁留題在重來直似歸野鷗終自遠 舊來積水潭鷗鶩成羣今水涸無復至者 巢燕復相依獨樹

風吹急叢葵雨打稀避炎宜塏爽作計未全非

疊前韻與同年賀集洲沈岱瞻家東亭時三子皆同寓

曲尺移牀臥分曹賭墅歸浮蹤雖泛泛鄉語自依依到眼青山近梳頭白髮稀

杜門深自念五十九年非 東坡云定居之後杜門燒香深念五十九年之非余今年恰五十九故云

小憩一莖菴與靜章上人

槐影落空庭晝長鳥聲樂我來叩門入濃綠淨如濯禪牀聊閉目非夢亦非覺
微涼何處生風動袈裟角

寄祝竹垞先生八十壽二首

當代龍門望不輕得官何必盡公卿風清李泌神仙骨 帝錫張華博物名

經研

博物 御書賜 先生匾額也 茗椀登堂無俗客籃輿扶路有門生蟬魚不蝕長生字老閱巾

箱眼倍明

自返初衣不記春十年鳩杖又隨身百分盞滿休辭醉萬卷書多轉益貧荻火
烹鮮鱸氣味松風吹長鶴精神脩然出處行藏外要是江東第一人

趙价人乞東籬詩戲贈

君不識陶公而乃號東籬君又未識我來乞東籬詩我雖未識君尚幸生同時
陶生千載上知我與君誰譬如夢中人此夢非彼知形開神或合閉目若見之
孰謂淵明心與君不相期我詩豈妄作成此一段奇

題同年詹允繩小照二首

射策成名已有餘百城高擁意何如石田佳句堪移贈更讀人間未見書

萬卷傳家手澤新五經腹笥自紛綸也應留取餘光在分乞去聲然糠鑿壁人

秀野草堂圖歌次顧十一俠君原韻王麓臺仿董文敏盧鴻草堂筆意朱竹垞有記

某樹某水與某丘曠懷往往消百憂無端弓旌被縵鎖坐對塵壒生牢愁盧鴻

草堂圖閱世已千載十志並流傳其人儼如在問誰好事供瀟洒毋乃真迹留

王宰華亭最晚出樵本發精采今之妙手繼者誰摩詰前身應畫師丹青一變

粉墨骨寫向尺幅尤雄奇云是吳中小秀野何斯佳境移於斯堂中主人顧十

一結客論文兩豪逸百家汎濫流溯源萬口喧傳名副實我是當年入座人淋

漓衫袖梨花春愛其披豁氣誼真丰格仿佛餘先民宴衍之樂非絲竹水色烟

光入窗綠半酣颯沓風雨來歎玉跳珠三百斛辛巳初夏大雨中過秀野草堂坐客皆盡醉鐵崖老

矣阿瑛貧空巷閑拋薜蘿屋可憐相見鳳城西僦舍還同燕子棲猶能折柬致

朋舊局促肯放詩名低我詩胡足道依樣葫蘆畫中藁惟君癖嗜之擘紙含毫

共研討留題慣惱麓臺翁作記深慙竹垞老吁嗟乎神仙富貴孰有無默存豈

必皆清都夢中五岳巾箱圖君歸來兮挾我俱以神爲馬遽爲廬一息十反良
可娛賃春齷齪難久居乃獨憐君屋上烏

椿樹草堂月下分韻得侵字

銷夏第一集

草堂無樹月無陰但覺風生露氣侵跌宕久嗟良會少疎狂終託故交深閒消
長夏宜甘酒老傍清光耐苦吟從此京華比河朔壚邊知費幾招尋

初伏日集張天門前輩寓齋暑甚晚雨微涼

流金已是報初庚誰耐銅街襍穢行伏日人歸東閣早條冰銜署一堂清風能
却扇炎何有兩解催詩晚竟成買得荷花兼買葉碧筒留待夜深傾

曉仙謠效溫飛卿體

潁霞照夕騰香氛丹樓絳闕五采文蟾蜍流銀兔噴玉澹作淺碧魚鱗雲西池
宴罷瑠璃淨杯面團團墮圓鏡露警花宮酒乍醒紫文早奏馳名姓天雞振翰
來剛風俛聽萬戶膠膠同九州大夢呼未覺海底忽躍踈烏紅龕鬚絳節凌虛
去隱隱笙歌動初曙一鶴高飛何處尋羣仙只在朝真路

天門席上分賦宣審盤中果物余得文官果限官字

甲拆終難透勾尖幸自完直同蘆笋淡不比柘漿寒細剖分甘癭同登祕色盤
文名差底用一笑顧園官

長林豐草吾廬圖爲林鹿原賦

銷夏第二集

鹿原名字天下聞鹿原非鹿乃龍文雄姿壯不受羈鞅蹴踏往往空其羣世家
嗜好通入分楷法偶撫王右軍一目之羅魏舒射此事胡足以盡君然而受
知徑以此遂釋塵褐干青雲日星煌煌懸御製目眩旁觀敢偷睨居然給札

給隃糜染翰朝朝得瞻睇天生本性終難奪疏越么絃發孤詣爲言吾自愛吾
廬豐草長林海南滋問君結廬曾否成向人指圖先署名譬如驥隸負轅軛心
縱欲往歸無程老夫曩客三山麓正值山頭荔支熟汝兄謂同導我入西禪冰

瀉銀盆香剖玉而今道遠歎莫致畫餅寧堪飽饒腹不如棄置兩忘情且免騎
驢度三伏珊瑚作鞭金絡頭幾時穩放華陽牛林深可投草可臥此畫便是逍

遙遊

李簀齋招集聖安寺納涼得火字

銷夏第三集

百蟲之長人爲羸熱屬欲逃無計可況當九陌鬱蒸天萬甌烟騰塵壘堞連晨

喜赴遠坊招似翼辭斂鏃隨笥聖安寺古洵幽寂湖柳村荒尤僻左主人未到

但居僧衆客後來先揖我

是早余最先到

初除鼠跡布禪榻旋掃蛛窠開殿鎖槐榆蒼

翠滴苔磚鬼佛青紅填粉堞黃金鑄橘南曦斂空穴來聲土囊哆須臾雜沓履

綦集鉅釘駢羅肴核夥臨淄揮汗河朔豪物外無炎安用躲平生曾授楞嚴偈

欲賦蘭臺愁炙輟一官涉世馬加銜千緒縈身蠶自裹動搖煖觸互起滅煩惱

清涼遞吹簸稍知冰釋還成水不道風生却從火悟來性火本真空透過風輪

乃初果

以上六句皆本首楞嚴經語

何人可語清淨退

宋劉凝之有清淨退菴朱子爲作記

此地差堪盤礴裸

偶因趁伴作良遊依舊觀心同宴坐自然熱毒無罅入更怕虛空有堆埵好音

到耳微雨來清景回頭夕陽墮明朝俛仰便陳迹閒處知經幾喧歌野人好涼

兼好靜夙畏浮名今亦頗打鐘掃地結願存

樊南甲藁序云惟願打鐘掃地爲清涼山行者莫遣新詩

浪傳播

陳月瀧太常蘭竹草蟲畫二首

離披九畹兩垂葉天矯半庭風
戛竿知是誰家舊籬落卻煩禿筆寫荒寒
蛟蝶蜻蜓盡作團幽人措意非無端
春蘭作花危石底瘦棘高於秋竹竿

白沙翠竹石江圖爲吉水宗伯李公賦

卽用題中
六字爲韻

展卷復長吟雙清到心跡秋風何處來
滿眼江湖白我公似康樂在家久忘家
盤陀一片石坐閱恆河沙

巖廊四十年夙昔青霞志興到一回頭
鄉山渺空翠

一寸二寸魚三竿五竿竹何必記平泉
寓庭幽事足

靄靄林表雲鑿鑿波底石獨抱万里心
卷舒不盈尺

過客尙留句愛茲山水邦天生好圖畫
應屬李文江

分咏京師古蹟得貫休畫應夢羅漢像

銷夏第
四集

五千五百阿羅漢出世生天登彼岸
其中尊者十八賢龍象騰空來震旦
白描晚入龍眠畫魔嬈紛拏雜真贋
豈知遠出百年前巨幅流傳磨不爛
翔麟供奉

貫休入蜀賜紫為翔麟殿內供奉 浮屠人詩才繪事兩絕倫自言夢與應真遇覺來肖貌兼傳

神心追手撫一揮就少緩則逝將失真豐頤槁項多變相喜者含笑怒者瞋蓮

藏已登禪月集貫休詩二十卷名禪月集刻入大藏 此圖淪落偏風塵老僧古寺深埋照異物將

歸有先兆當時畫本夢中成此夕遽然神復告明朝有力負而趨卷軸儼隨飛

錫到或疑十八缺其二恐與李圖均被盜相傳明因寺中舊有李伯時畫渡海尊者圖不知何年為人賺去存者廣

本而僧不知也 巧偷豪奪孰有無古往今來夢一覺去聲嗟嗟神物難久貯莫逐青蚨便

飛去君不見虎溪橋畔廬山路羅漢曾為押綱具用曹翰下江州事

雨中蔣青棠孝廉邀集城南張園用南字

竹梧花藥勢相參門徑依稀到尚諳重與尋幽同野外早曾聯句向城南亭臺

易主名猶昔風雨留人晚更酣二十五年真一夢白頭搖落感江潭甲子秋與姜西溟魏

水村惠研溪輩十七人飲酒賦詩於此爾來園亭凡三易主矣

夏日咏物分得青奴

織作交加翠留筠發冷光卷舒隨笛簟瑩滑稱藤床比扇三秋棄如童五尺長

玲瓏須會取卽事有炎涼

次韻答周漁璜前輩見寄

結習多生未易捐得公投句喜登然遠山擁髻潭如鏡秋水平階屋似船已外

形骸猶有夢不離文字豈能禪來詩云詩人垂老例參禪 祇應借佛論詩境何法真超色界

天時以拙稿就正于先生

以蜜漬鮮荔枝二枚分餉漁璜前輩蒙示絕句二章次韻戲答

從知物以少為貴兩首詩酬兩荔枝焉得嶺南三百顆博君一顆一篇詩

重馬馳來幾騎塵開奩分餉孰如新老饜舌在終能辨風味依稀似故人

立秋日陳南麓都諫招集挂雲書屋

老樹蒼藤捲幔秋旁添籬落綴牽牛鄰沽滿眼分清濁諫紙開箱給唱酬小榻

迎涼仍北嚮斜陽如火又西流誰能不領園林趣每到君家愛少留

匡山讀書圖歌為南麓都諫賦九言古體

我昔嘗吟太白廬山謠亦嘗身到九疊屏風坳谷簾瀑布倒挂幾万丈五老峯

(天)

勢競出爭嶮嶸一筇兩屐十步八九顧東西南北上下同猿獾太白書堂不知
 在何許樵翁指點此地雲松巢披榛取徑晚入青蓮谷道旁石刻大字深而顛
 三尊銅佛塵昏儼泥塑半截苔碣對圻如坤爻多年老鼠化作白蝙蝠飛攫鶴
 卵占斷長林梢爾時曾作世出世間想曷不於此翦棘編蓬茅故人相招頭白
 早歸去誤落塵網乃被移文嘲黃門先生今之嗜古者展卷彷彿以漆來投膠
 風埃骯髒衰衰胡足道直引謫仙居士為神交當時手持玉尺往校士剖析白
 黑銖黍疇能淆眼中了了忽現雲霧窟匡廬面目踴躍隨鞭鞘還朝改官載離
 七寒暑百四十寺鐘鼓猶鏗敲命工寫圖聊寓瀟灑意遭逢大聖主牙笏那得
 拋羽皇新銘都付夢遊境與雖勇往跡繫烟中匏棲賢拾遺讀書舊曾隱公擇
 山房萬卷亦手抄茲山圖記流傳代不乏但恐再往之計成浮泡清泉白石有
 約倘勿負君其少緩容我為鳴鶻

陳會典江西鄉試故
有玉尺校士之句

分咏詩人居址得東坡

迎涼第
五集

東坡本屬宜賓郡桃李陰從郡圃收前輩風流傳白老後來名勝擅黃州

白樂
天為

忠州刺史於郡圃東坡手種桃李往往見於詩句蘇公自謂出處老少粗似樂天東坡之號實本於白非偶合也平生得力在憂患此地何心繫去留大似高鴻向寥廓雪泥指爪記曾否

牛鳴雙村棹歌爲郭于宮賦四首

水淺沙平閣短篷西陂東埭往來通綠蓑影裏跨牛渡閒殺兩樵南北風
烟光霧氣不曾乾人與眠鷗共一灘湖似貫珠船似蚌酒如碧玉蟹如盤
見說江南水拍天而今江北占豐年自來葑塞湖邊住黃犢生兒愛種田
小塿新開未起租四圍一色萬梢蘆紅薑紫芋村村熟不怕人閒有寇鳧

七月十四夜寓樓對月

此地殊空闊高樓更上層天孤一輪月星散萬家燈稍覺浮塵斂俄看濁水激
夜涼人不寐好景惜憑陵

題恬菴上人匡廬訪道圖二首

惠遠與少文前生定同社可惜愛山人今非住山者

五老雲松頂初登不道難近來無脚力只愛畫中看

壬申秋余遊廬山會上五老峯觀海綿故云

七月十五夜陳六謙過寓庭月下小飲

時六謙將出守南安

十頃空潭半貯泥秋蓮晴湧綠頗黎

是夕積水潭放河燈

城空鼓角聲初動月出樓臺勢

盡低佳夕一歡成邂逅故交垂老惜分攜燕堂酒熟梅花發莫忘清遊補舊題

六謙黔中往返詩無見及者故戲督之

題史耕岩前輩溧陽溪山圖即次原韻四首

良常東下路斜斜小塌平橋接兩涯夢聽雷平池畔雨覺來滿崦是桃花

桃花崦見

顧况詩句曲勝地也

栽桑種稻互回連柳色騎牛浦浦烟碧水繞田田繞郭村翁不識縣門前

官情澹與昔賢同聊寫歸心寄兩濛此段風期難擬似王家輞口謝東中

洮湖如鏡照人明雲霧翻從展卷生欲借公詩論米畫筆端風雨勢縱橫

米元章舊

有溧陽溪山圖故云爾

題邵甘來匯水村居圖

修篁出屋柳沿隄牛放前灘鴨後溪吹得讀書聲過耳釣絲風色板橋西

初遊城南陶然亭

望遠村東緩轡遊

余寓居道院在望遠村東去亭纔二里

忽從飲馬得清流黃塵烏帽拍身晚白

露蒼葭洗眼秋風偃萬梢鋪井底日斜雙鷺起城頭誰憐一派蕭蕭意我是江

湖未泊舟

種藤歌為周桐壆前輩賦

迎涼第六集

吾聞管子云十年計樹木稍欲望成陰寧須校遲速君言美蔭貴目前疇能鬱

鬱待十年兩株柔木手交植意取引架遮炎天插竹扶持工乍畢玲塢未騁龍

蛇質綠痕冪作薜荔牆不與先生障西日盆池鰲水置廣庭細鱗戢戢多于萍

碧天倒影落萬丈夜久却涵三五星此間露坐差不惡翻怕團團葉垂幕放梢

何日過隣家留待春風看瓔珞

家德尹潤木兩弟先後就居皆與先生比隣

德尹請假出都志別八首

去年夏旱今年水入口窮鄉那免饑我坐欲歸歸未得得歸何忍阻君歸

植檜移松已兩年家書頻寄問西阡洛陽二頃談何易稍喜躬耕有墓田

纔報歸期想候門夢中燈火荻花村天教此老桑榆暖六十攜兒似抱孫

舊巢架構鳩雖拙老樹婆娑蠹已除樊圃早垂黃橘柚開池先養白芙蓉

涉脚迷途幸未遙六年官簿咲同寮輸他勇退能過我多賦山居少在朝

癸未

秋假歸丁亥冬還
朝今又以病告

乞官無復步兵廚米價新來貴比珠慙愧臨行留薄俸折支能博酒囊無

宋時
檢校

官折支例得退酒袋東坡詩有猶費官家
壓酒囊之句時俸米方議改折故及之

消夏迎涼紀歲華自五月以來同人為消
夏迎涼之會會必分題離筵忽漫對黃花一尊勸汝重陽酒

若箇登高不憶家

一菴猶欠結茅資竹本花栽要及時煩寄兒曹無別語為余勤補舊柴籬

孫觀河無隱室乞題詩

丈室初從月地分木樨開後又逢君香風自滿三千界鼻孔撩天幾箇聞

座主相國澤州公有別墅在西苑旁政事之暇間一憩焉因取唐人郎

士元詩意名曰半日村高咏成篇命余繼和恭賦一章時長至前二日

頻傳騶唱出闕坊沙路西連紫界牆一室凝香回暖律萬峯銜雪冷斜陽圖開別墅原同謝詩取佳名亦愛唐會得先生瀟洒意寸陰還較小年長

紫滄同年出示百聲詩凡天壤間有聲之物無不入其牢籠和之不勝和也冬至日獨直西苑心有所會偶拈四題兼寄靈隱諦輝高旻湘雨兩禪師亦屬並和

梵天一晌沈寥開誰激華鯨怒吼雷日落空林無客到烟藏遠刹有風來三生同聽人何在半夜孤眠夢忽回一百八聲敲不斷苦教積劫墮輪迴鐘聲

範金琢玉記同編古製難從磬氏傳小雨泠泠晨洒竹孤燈裊裊夜浮烟軍持

老衲腰同折香積空廚室並懸最憶山堂秋講罷一聲清徹似巴蟬磬聲白樂天詩巴蟬

磬似

緣木求魚又一奇巧將法器付雕師空虛自與敲鏗應緩急都於梵唄宜響入

松濤疑掉尾枯逃世網賴棼椎憑誰悟徹前塵事身是他山啄木枝木魚聲

三災騫過晝沈沈窳堵波高蘭若深已向池中懸倒影又從天半落清音石如

解聽無生話風豈能搖久定心若問此聲何起滅本來無縫杳難尋

塔鈴聲

冬夜集潛齋分韻

我愛陳學士古歡金石諧在躍不忘潛而以顏其齋寓直少閒暇暫歸召朋儕

設繪當嚴冬迨茲風日佳素心五六輩步履相與偕君家門庭高俗子無由階

相公聞且喜初筵示模楷獸炭紅麒麟地爐宿燄埋分題命觴咏

是日相國命題衆各拈韻

合座忘形骸盆梅初著花行列如人排疎影落杯底清香入奇懷五言率未成

壹醉衆已皆頭盤雜拇陣錄事主所差錢

綱若千與頗豪顧君縲芷

湘量靡涯陳

子世南氣稍怯罰籌密於馭臥奪玉頰山浮蛆碧傾淮余惟兀然坐幸免出而哇

客散二履留

是夕余與綱菴留宿齋中

連床聽膠嗒明朝寒栗烈雪花點銅街詩成從馬上

醉眼還重揩

冬夜讀亡友錢木菴詩中有咏塵咏影二首嘆其學道有得追和原韻

果否蓬萊海底生本來無質自然輕狂能眯目虛空暗細解窺窗穴隙明羊角

團團多借勢馬頭滾滾似趨名泥融雨浥終難盡那得乾坤一掃清

右咏塵

寓形宇內豈惟人幻出無端現在因我覺官骸多是假汝依水月詎爲真隨身
只怪趨難避面壁誰知坐轉親吹却油燈何處覓佛光中現舜多神右咏影

十二月初五夜夢一僧叩門乞詩夢中了了作四言八句覺而錄之

有目斯翳有耳則鳴人方擾擾竅聰穴明空卽是色寂于何聲混沌不鑿以全
其生

謝院長餉白魚牛尾狸

樵山擘水致珍羞陋巷敲門荷見投細剝銀絲防骨鯁爛蒸玉面惜膏油酒嘗

雙榼鮮同擊周紫芝詩買魚配酒爲君糟壓三冬膩欲流東坡詩長羨淮魚壓

壓入糟盜膩欲流 自分生平藜藿腹得兼二者更何求

院長疊前韻見貽追憶十六年前唐東江與余晨夕唱酬事再疊韻奉

答

憶昨狂吟不自羞瓊瑤屢報木瓜投名園擘紙移朱舫綺陌迴鞭避碧油花下
清尊殊跌宕雪中白戰也風流唐衢去後交遊冷忍聽嚶鳴出谷求

次日復惠黃柑冰鮮兼來索詩再賦二首

登梓磊落皆三寸照眼輝煌得八枚羅帕分甘先令節碧香留賦待新醅漸回
冰齒瓊漿暖試奏霜刀綠霧開便與魏橙同給客拜嘉真自永嘉來

橘譜出永嘉者爲真

柑

風味依稀似鱠殘侯鯖一月貴長安豐肌弱骨和羹美雪片冰花入座寒欲報
已無青玉案盛來兼乏水晶盤連朝小試烹鮮手只累先生減食單

鑿冰詞

朔風兮夜號百川兮晨凍射白日兮冷光柔變剛兮石無縫千夫杵兮聲沖沖
嗚然解兮塊斯融天倒窺兮尋丈下歸無極兮馮夷之宮吁嗟乎冰堅可藏兮
從爾鑿亦既臨深兮其毋履薄

次韻答李秦川

衰年注蟲魚如蠹蝕書史迂疎衆所易末契得之子扣門晨有投藻句霞散綺
師承得前輩出語究終始子生本名家抗志矯波靡昨來應秋賦名溢人口耳

展足抱未攄挽頽力堪仔詩才尤秀拔氣壓侯叔迥當今大雅宗四海歸繡水
一老謂竹垞先生導其源揚瀾賴多士新倪擢茗穎舊調削軟美味道庶在茲詞章
寧小技君看鳴陰鶴豈有寡和理餘風被東南矧迺桑與梓老人慎許可僂指
故無幾往往爲余言後來惟一李余雖分拙劣夙好附羣紀來篇等括張機觸
難自止殘冬互酬答塵芥何足洗

題劉若千前輩夜雨對床圖小照

我恨不如遵渚雁行列羣羣飛不斷又恨不如同隊魚朝朝在藻還依蒲可憐
兄弟如相避萍梗沈浮劇兒戲壯年作客晚筮仕投老茫無歸宿地偶然風雨
一連床僮僕旁觀詫奇事平生怕讀穎濱詩中有傷心幾行汨關中二劉今二
蘇才名宦跡兩不孤有生聚散誰免得看取對床聽雨圖長公秀骨仙之臞次
公白晳豐而腴題詩尙爾感顛顛令我展卷增嗟吁關河南距四千里正坐一
官爲累耳不見伯淮季江屢詔徵不起肯以元纁易布被

送勞介巖副憲歸里

十二月十五日

老伏青蒲振直聲冰霜凜冽歲崢嶸風波孰與批鱗險華衰何如拜杖榮九死人皆危此舉一歸天特厚餘生猶憐不及商山老鴻鵠飛時羽翼成

敬業堂詩集卷三十六

...

...

...

...

敬業堂詩集卷三十七目錄

槐籜集上十四日奉

春冰次院長韻

人日出郊

院長餉新年食物兼示四絕句次答

鮑魚

蠟黃

對蝦

黃雀

春風次院長韻

次韻春雪

長孫與祖就婚雲夢寄詩示之十韻

院長餉柿霜餅兼示長律十二韻次謝

院長以乳酥餅見餉仍有詩索和謂余深於禪理戲作偈語次韻奉酬以紫檀鏤管筆一雙饋院長兼呈拙句

湯西厓前輩自洛中寄示重修香山寺記石刻拓本

斗室

題吳寶崖雪龕煨芋圖小照

去年過塔灣湘兩禪師出所纂金剛經順意見示攜之行笈欲為刊刻流傳有志而未逮近以呈院長蒙疊筆字韻詩盛相稱詎輒次韻奉酬敢請院長為功德主此篇聊當募緣偈一首也呵呵

座主大宗伯許公七十壽辰敬呈長律四章

余自甲申春寓城南道院丙戌十一月請假暫歸戊子三月抵都重館于此己丑上巳前一日將移居宣武門外臨行題壁

西苑新直廬

移寓示潤木二十韻

三月三日雪後赴西苑馬上作

暢春園杏花次李義山舊韻

落花和陳潛齋學士韻

同年蔣西君卜築西郊詩以落之仍

次移居二十韻

暢春園芍藥

西君同年餉甘蔗

下直經澹寧居後見新竹出牆

四月二十四日奉

旨偕錢亮功汪紫滄兩同年赴武英書局編纂佩文韻府口占示同事諸君二首

武英殿後老桑

六十生日竹垞先生遠寄名錫唾孟茶餅

槐陰露坐

鵲雛為隣貓所攫

自書局回寓作

喜雨

大雨過玉竦橋

新晴赴書局

庭樹聞蟬

種竹

瓶中白蓮朝開暮萎

對鏡覽髮

夜枕喜雨

新涼

秋日江亭雅集有懷舊遊寄晚研滄洲西谷簣齋鹿原天農及家德尹得

遲字

一日假

旦入宣武門

題爛堂奉母圖為郭于宮尊堂呂太

君壽二首

張副戎有愛姬二人去年重陽日各

生一子命工繪圖同年劉大山有詩屬和一首

少宗伯王瑁湖先生別墅名甲秀園

皇上南巡雲間凡兩幸焉先生

自作紀 恩詩屬余繼和次韻六章

九月二十日偕紫滄亮功兩同年赴密雲接 駕往返三日馬上即事六

首

送孟靜齋之任錢塘二首

齒痛借用昌黎韻

初冬集春暉草堂賦得菊殘猶有傲

霜枝十二韻

擬樂天一字至七字體以題為韻分

得簾字

十月望後前輩周桐野同年王樓村

雨中過槐窻看菊留小飲明日桐翁以詩見投次原韻二首

題湯西厓前輩出關圖即送赴奉天府丞任六首

題紫滄醉吟圖小照三首

古詩

題翁樹服別茶圖小照三首

盧六以庶常自藩邸入直武英每乘

小車以詩索和

送宋蘭暉庶常養親歸商丘兼呈漫

堂先生四絕句

得東亭弟滇南書知補授太和令作

詩志喜

從廟市買梅花水仙二盆口占二絕

答硤川程子和

除夕前四日宮恕堂寓齋消寒雅集

次東坡答段屯田韻

次潤木除夕感懷韻四首

敬業堂詩集卷三十七目錄

六建二十...

...

...

...

...

...

...

...

...

...

...

...

敬業堂詩集卷三十七

海寧 查慎行 悔餘

槐篠集上起己丑正月
盡十二月

去宣武門西半里許有陋室十餘間局鎖頽廢有年矣己丑二月自西苑
下直歸從馬上望見老槐二樹亭亭出屋顧而樂之遂僦居焉爾雅連謂
吾之篠疏樓閣邊相連小屋名也因借樹以名吾集

春冰次院長韻

怪底堅成脆行逢凍釋時寒無蟲可語暖被鴨先知裂縫防頽岸留痕驗故池
何當供夕飲春氣漸如炊

人日出郊

老夫新年年六十酬應昏昏忘盥櫛朝來準擬出郊行走馬看山作人日西風
撲面飛黃埃忽憶故園新種梅詩成寄問草堂弟臘尾春頭開未開

去年正月
於西阡種

梅數
十本

院長餉新年食物兼示四絕句次答

類篇止有鮓魚字梵語蘇詩恐誤人

說文玉篇俱無鮓字司馬公類篇有鮓魚釋氏稽古略謂寶公吐鮓成活魚今江中

洄魚是也東坡詩中作鮓洄與鮓當是鮓字之訛本草失于考證故及之

我是江湖釣竿手為公箋釋到纖鱗

次韻鮓魚

半殼含胎剖蠣房鮮宜糟壓嫩宜湯黃封拜

賜連朝醉特試先生醒酒方

黃蠣

淪湯可以解醒

次韻蠣黃

吾鄉海錯雜魚蝦細瑣登盤品亦嘉忽見銀鈎如椀大閩人好對浙人誇

次韻對蝦

嘉禾舊志說陶莊黃雀肥時早稻香

徐碩至元嘉禾志黃雀出陶莊秋後最肥

自別家來無嗜好滿

餅鄉味荷分嘗

次韻黃雀

春風次院長韻

又隨步履散今朝紫陌微微去轉遙頗訝渡河冰易泮不知吹鬢雪難消南枝
暗放參差蕊東面偷迎宛轉條二十四番誰管領等閒聽過賣錫簫

次韻春雪

春寒不與臘寒同微霰來沾弄袖風翠浪舞當三白後香泥巧借六花融飄殘
柳外濛濛絮送盡江南片片鴻莫倚侵陵萱草色繞階須護蕙蘭叢

長孫興祖就婚雲夢寄詩示之十韻

聞說求婚媾爲期在此春抱孫吾記日配婦汝成人雪棹吳江岸風帆楚水濱
間關憐道遠出贅笑家貧締好因同譜親家沈翰逸爲
癸酉鄉同年居鄉本比隣禮從荆布

舊義取悅禰新莫倚嬌爲壻須存敬似賓葭莩方有託骨肉自相親去迨冰開
候歸當燕乳辰阿翁南望切書報勿辭頻

院長餉柿霜餅兼示長律十二韻次謝

駢實交柯重金烏下啄同小園秋晚挂古寺日高烘爛爛燒空赤蒸蒸耀眼紅
蒂留紅袖織用白香山
詩中事葉受墨光融用鄭
虔事耿餅佳名著梁棹上品充滑凝流石

蜜寒欲殺尸蟲玉井千珠落丹田一氣通齒疎宜軟美喉潤覺清空止嗽方殊

驗時余方苦痰嗽迴腸味不窮殷勤開尺幅檢點閉輕籠食罷仍蠲渴詩來況愈風多

煩霜雪意寵貺白頭翁來詩結句云還堪持獻壽好配紫芝翁

院長以乳酥餅見餉仍有詩索和謂余深於禪理戲作偈語次韻奉酬
昔聞佛者言醍醐蓋有自初從牛乳出香美非思議於中得酥酪先後當以次
我意殊不然強生分別事先生味禪悅故以機相試聚為一團酥是一要非二
散為百千餅又豈百千味當其為乳時涓滴白牛致云何清淨腸猥用忍草飼
我無廣長舌報以直實義請看牧牛者苦苦掣其鼻不若聽所之放牛着露地
人牛兩自在彼味非此嗜莫管乳酪酥醍醐孰同異

以紫檀鑊管筆一雙饋院長兼呈拙句

客從吳興來遺我雙不律森然秋兔穎毫末羞自匿削管用紫檀可手製新出
免冠頭不禿肯入中書室我老腕力微何心計羸絀學書疑有鬼覓句懶無匹
留之注蟲鰈如膠柱鼓瑟故用移贈公庶幾副其實吳俞世不作

吳政俞俊皆北宋時筆工

也諸葛法久失錢沈亦名流後來費評隲雖非金與銀鏤刻分纂述猶勝斑與赤輕脆抱空質上將點絲綸次亦標甲乙含毫特餘興揮灑膏繼日新年富新詠傳示盈卷帙浩汗或掣鯨精微乃貫蝨儲材等武庫應敵在倉卒不以老見輕有作例牽率余雖勉屬和十駕爭及一從公乞餘波仍以詩侑筆

湯西厓前輩自洛中寄示重修香山寺記石刻拓本

龍門十寺已全荒金刹誰尋古道場劫外豐碑開闕塞天中軼事在文章雲泉

舊境緣曾結白樂天香山寺詩且共雲泉山水初心後果償幸為山水主是償

也語出樂天公是樂天還記否前題多在暢師房

斗室

斗室無風入香巖正寂然一株婆律火半榻祖師禪白雪將灰候青烟未吐前此時參鼻觀消息向誰傳

題吳寶崖雪龕煨芋圖小照

神仙只累十年官枵腹聊爲一飽歡何似雪龕風味好平生不喫懶殘殘山人更喫

懶殘東坡
逸詩句也

去年過塔灣湘雨禪師出所纂金剛經順意見示攜之行笈欲爲刊刻
流傳有志而未逮近以呈院長蒙疊筆字韻詩盛相稱詔輒次韻奉酬
敢請院長爲功德主此篇聊當募緣偈一首也呵呵

五十墮醉夢不知經論律一從讀金剛稍開雲霧匿深沈百尺低垂縷汲使出
遊子久離鄉于焉返家室旣歸翻自痛精進力已絀欲除人我相兩敵勁無匹
又爲義疏誤孰與更張瑟晚遇馬蹟師貝多示真實微詮警後悟妙解證前失
俗昧知者希我衰天所隲誓將廣流布期不虛纂述先生一見之析義豈待質
執疑兩破碎決若魚去乙詩來盛稱揚方便皎慧日黑蟻二方言卷之僅盈帙
護持付龍象普度及蟻蟲開雕指顧成功德亦易卒檀那視積纍幸以銖兩率
恆河計沙數百億生于一庶將擬楞嚴勝授房融筆

座主大宗伯許公七十壽辰敬呈長律四章

巖廊重望冠清都黃髮年尊與道俱燕許文章唐巨手程朱理學宋醇儒龍門

拔地孤逾峻鳩杖隨身健不扶指似天文人盡識壽昌方叶泰階符

司徒崇秩晉春卿端右迴翔寄不輕公自起家敦孝友世因瞻斗重科名衣冠

盛事耆英社鄉國餘風月旦評歷政不緣中外異依然冰貯玉壺清

集賢曾寫樂天真九老中今第幾人三月韶光連上巳三月二日公誕辰也七旬觴詠屬

初辰芝蘭得氣殊庭秀桃李成陰薄海春共仰官高能下士虛懷仍以讀書親

朝回晝靜愛長閒笑說生平杯酒間却向烟霄頻矯首每從風月一披顏莼鱸

遠夢馳千里松鶴高情在兩山欲御籃輿知有處谷湖柳色待公還

余自甲申春寓城南道院丙戌十一月請假暫歸戊子三月抵都重館

于此己丑上巳前一日將移居宣武門外臨行題壁

三間古觀稱羈棲五見空梁補燕泥欲去每教僮灑掃再來猶認客留題壁間有同

年王方若題句飛鴻印雪原無跡倦馬辭槽又一嘶怪底老懷殊戀戀西山多在短牆

西

西苑新直廬在澹寧居後

雪林風沼候參差休假俄經百日期

去年十一月奉直至今二月恰百日矣

旨暫停入魚鑰曉嚴新

契勘鄭谷詩門嚴新契勘

鳳巢春換舊棲枝路迴稍覺穿花遠窗靜從看過影遲笑逐班

行重入直龍鍾已是杖鄉時

移寓示潤木二十韻

久客身何着今來願始諧買鄰無百笏僦舍為雙槐

中庭有老槐二株

迢遞連城角沿

洄阻水涯閑坊聲較靜濕地勢微注東野攜家具西枝寄病骸未能行躡屐那

免出傳牌彙俸先期給劔童冒雨差無妻中饋缺與弟入門偕白木床分設烏

皮几對摺布衾寬稱席石炭賤踰柴茶竈商量置書籤整妮排窗緣絲網掃池

用瓦盆埋卷幔通巢燕登拌待食鮭廚空浮白殘壁挂踏青鞵車騎經過聞風

光漸次佳但教塵隔巷翻愛草侵階擊鉢旋相和吹篴分不乖近宜論洽比遠

或召朋儕汲井昊天寺買花南市街經旬許休澣亦未廢清懷

三月三日雪後赴西苑馬上作

鳳城西北苑東偏白髮尋春又一年殘雪泥融芳草岸

昨夜微雪薄寒風勒柳花天

非無好景來林外，尚少遊人到水邊。獨把吟鞭，敬醉帽時逢。修禊想歸田。

暢春園杏花次李義山舊韻

杏苑即仙源，含情似欲言。問名憐及第，鄭谷曲江紅杏詩為是春風及第花得氣儼承恩。流水悠悠

溶態，初陽淺澹痕。綠新宜柳映，紅遠覺桃繁。蝶翅輕三月，鶯聲戀一園。盈盈窺

紫闥，脉脉待黃昏。小睡披香暖，微酣帶雨溫。臘融難作蒂，溫飛卿詩融蠟作杏蒂脂染定

連根。何處堪凝望，逢人自悅魂。青旗風綽影，猶記酒邊村。

落花和陳潛齋學士韻

桃是深粧杏淺粧，開時有態落猶香。東風自借孤蓬力，流水何曾出苑牆。

同年蔣西君卜築西郊詩以落之仍次移居二十韻

薄宦居難定，同時興偶諧。我方銘陋室，君亦賦高齋。趙閱道有高齋詩作計寧非達，為

生洵有涯。背城山漸近，就水地宜洼。昨構才容膝，今營儼樹骸。舊材留梓澤，新

棟拆松牌。斤斧俄收響，僮奴免借差。落成三月速，扶挈一門偕。棗軸疲牛汗，楊

椿疥馬揩。烟光通禁籞，野氣入荆柴。但取藩籬便，何須闡戟排。書奇傾橐買，樹

好帶花埋北釀缸浮螳南烹案致鮭僧來攜蜀絹信去覓吳鞵壽母藤輿健嬌
兒繡祿佳碧枝風卷幔紅藥兩翻階卽事歡皆具生平願豈乖宵歸辭俗客晨
直約吾儕故國三千里黃塵十二街篋來除蔣徑無此好情懷

暢春園芍藥

萬卉爭春放開遲賸此花雅禁初日照濃被綠陰遮隔岸浮香霧臨池蕩綺霞
年年三月尾病眼閱繁華

西君同年餉甘蔗

小東青如削來從櫻筍鄉特煩良友餉何異大官漿促節過頭杖清泉漱齒霜

多君甘旨外有味必分嘗
前一日先惠櫻桃故云

下直經澹寧居後見新竹出墻

輕雷夜解斑籠籜地近宮垣勢便高應笑松栽成早偃多年猶未出蓬蒿

四月二十四日奉 旨偕錢亮功汪紫滄兩同年赴武英書局編纂佩

文韻府口占示同事諸君二首

六年供奉毫無補 天語蒙褻下禁中
聯步久趨丹陛北直廬今寓浴堂東
名連進士慙同進管禿中書笑不中
那免退之譏磊落依然爾雅註魚蟲

上窺典故薄風騷不數區區篆刻勞
才盡更誰哀老子課嚴渾似限兒曹
舊巢

未掃痕猶在

奉旨編纂事竣仍回南書房供奉

賜馬相隨骨漸高差勝漢廷飢曼倩
官廚豐

饌日仍叨

武英殿後老桑

出牆如蓋勢童童初日移陰小殿東
辜負江鄉蠶老候烏鷄餘椹滴階紅

六十生日竹垞先生遠寄名錫唾盃茶餅

張銅沈錫皆禾產一技成名不偶然
今日瓶盃成古器後生誰識百年前

槐陰露坐

我愛雙槐好婆婆娑滿院遮蟠根
容穴螳出屋帶棲鴉未落三秋葉
將舒六月花
近身安片席餘蔭給隣家

鵲雛爲鄰猫所攫

庭南老槐樹當暑花葉敷有鵲棲其間雌雄將六雛毛羽日夜長飼哺同慈烏
家書故鄉來好客與之俱查查每預報喜氣充我閭自謂得所主永無意外虞
鄰家黑白猫眈視生覬覦陰藏爪牙毒上樹捷飛颺六雛一被攫鵲起逐以趨
似將奪虎口性命還須臾又似望人援繞簷羣噪呼倉皇不及救坐視爲嗟歎
我墉被鼠穿唧唧繁有徒孔箱盜夜粟穴紙潛朝懶汝雖磔百千飽噉臥甍鼯
誰當刻責汝加以非分誅鼠黠鵲性良飛走族亦殊云胡於此暴顧獨於彼懦
叶平於彼爲養奸於此戕無辜汝腹縱暫滿汝腸義當剗吾欲致張湯詰之定爰
書公然掉尾去借鄰以逃逋

自書局回寓作

書局限孔巖晨趨事搜討歸來日云夕返景在林杪槐花滿中庭鋪積亦復好
小童懶無匹安坐終日飽故欲習其勤時時令汛掃清風颯然至葉有先秋槁
頗聞蒙莊言勞生佚以老信書乃大繆自計胡不蚤

喜雨

京師夏苦旱熏灼如炎方
霹靂偶微霑者盈道旁
滂沱忽大沛燦怒不得張
簷溜粗于繩翻瓢挹天漿
栽花得新活臥柳回舊僵
既雨萬彙蘇我亦中微涼
風霆一夢破境過旋已忘

大雨過玉竦橋

雨聲衝破影中天
百尺長虹萬頃烟
鷗鷺不爭車馬道
自遮荷蓋領雛眠

新晴赴書局

積雨暑未退快晴天爲高
肩輿出衝泥俯仰同桔槔
豈不恤人力用代鞍馬勞
竊祿多懷慙何如返蓬蒿

庭樹聞蟬

委蛻知何處吾廬忽有蟬
不嫌晴晝永轉愛綠陰圓
薄比彈冠況清同舉室懸
柴門虛倚杖悵望晚涼天

種竹

潦退庭宇涼奇懷赴幽獨
規將尋丈地遠景收淇澳
佳人來何方笑齒瑳冰玉

欣然肯相就陋室空於谷上承槐高清下蔭苔嫩綠未應供客看或取藥我俗
我俗庶可醫齋廚久無肉

瓶中白蓮朝開暮萎

街頭買白蓮帶露來座隅養之清淨水謂是西方姝朝爲木槿榮夕與桑葉枯
既開必有謝元化周斯須老人閱浮生過眼同一如那將熏染習累此冰雪膚
寄語散花天我非狡獪徒從今方丈室永拔污泥株

對鏡覽髮

我髮日夜短餘存諒無多既白會當禿不煩行羯磨人呼在家僧自署老頭陀
黃精無掃法奈此秋蓬何

夜枕喜雨

偶栽窗外竹初不爲秋聲忽洒三更雨瀟瀟亦有情

新涼

素角城端鳴初涼動砧杵西風一以發清絕遽如許大化日循環吾生幾寒暑

心空有遐託，寓無久處社。燕如知歸飄，然辭逆旅微。蛩漫多思啣，啣乃私語。

得遲字

酒徒半散天南北，嬾到今年不作詩。老去故應朋舊少，重遊兼感歲時移。孤亭窄似維摩室，秋水寬於阿耨池。却被居僧嗤冷落，主人來早客何遲。

是日郭雙村治具諸

君午後始集

一日假

偶得一日假，心安良有餘。簟涼便晏起，髮短罷晨梳。露角連城動，風蟬帶樹疎。故鄉頻水旱，翻怕得家書。

旦入宣武門

柵鼓傳三千門，開九衢。曙老夫肩輿出日，與輻車遇粉書。揚銘旌束縛同此路，死有千載暝生無。一朝寤嗟爾行哭人，啾啾百蚊聚。

語出楞嚴經

題爛堂奉母圖為郭于宮尊堂呂太君壽二首

天半鸞凰膝下雛承

恩先為老親娛愛他五綵斑斕袖曾捧驪龍四顆珠上皇

南巡時 御書禮教
克爛四字以 賜母

畫棟浮光縹緲間新摹

宸翰作堂顏天生才子如椽筆欲賦閒居可得閒

宮于

供奉南
熏殿

張副戎有愛姬二人去年重陽日各生一子命工繪圖同年劉大山有

詩屬和一首

臨觀恰是重陽卦不比徐卿二子歌菡萏秋房原並蒂珊瑚越網又交柯明知
照乘光相敵試問連城價孰多博得兩鬢開口笑一持侯印一提戈

少宗伯王瑁湖先生別墅名甲秀園 皇上南巡雲間凡兩幸焉先生

作詩紀 恩復屬余繼和次韻六章

甲秀園開碧泖潯每從廊廟憶山林花如韋曲傳佳句風自卷阿繼雅音兼托
丹青摹盛事獨將清曠契 宸襟九峯高倚層霄上俯入軒窗是寸岑

喬木千章竹万根 翠華臨處彩支繁帆檣隱隱頻移岸桑柘依依別有村綠

野天開裴令墅冶城人識謝公墩陪遊何必身親到魚鳥能邀再顧 恩

列仙圖籍本雲霄物外心期故自超雅有新裁矜 異數喜聞屬和徧同朝兩

回 步輦花間入一色春旗柳外飄透出斗中光万丈 御書樓閣冠巖椒

靈壽無煩借孔光朝回展卷好相狎書臨 勅賜松花硯笏聚家傳鑰石牀蘭

畹芝庭方競秀石田茆屋豈全荒承明又 召枚皋入始信烏衣世澤長時長公麟

昭被 旨 供奉內廷

一花一木記平泉手植何人不解憐此日韶華娛 舜目幾家雨露長 堯年

波搖曲沼黃金縷欄亞新叢碧玉椽總在雲蒸霞蔚裏畫圖欲繪恐難全

陸機茸外野人家萬頃畦風養麥花曉徑烟巒成掩冉晚春雲物貯清嘉山莊

細雨初回 輦官焙頭綱正試茶扈從班中曾耗筆為公濡翰語非誇丁亥三月余隨

游 駕獲 園中

九月二十日偕紫滄亮功兩同年赴密雲接 駕往返三日馬上即事

六首

黃收朔野橫從畝紅散霜林遠近郊不是三人同寓目一年此景等閒拋

同官同直還同譜六七年來不暫分比似天邊一行雁飛鳴食宿總成羣

塞柳風高遞急砧 回鑿時節正秋深身如舊 賜天閑馬暮齒猶餘見獵心

翠眊朱旂歲往來歡聲奮地又如雷關南黎老爭扶杖重見蒼龍侍 輦回

蝗不成災慮種遺撲蝻有 詔責官司直從場圃初成候笑到明年稻熟時

載路頻聞樂土歌 聖恩寬大緩催科太平是物皆蕃庶斑鹿黃羊獲校多

送孟靜齋之任錢塘二首

水旱頻傳接井疆畫船簫鼓半荒涼欣逢悃悃無華吏往拯租庸積困鄉郡守

賢如龔渤海謂張裕齋州民窮有鄭滎陽謂老友鄭息廬此行直比陽春脚膏雨隨車到一

方

不改書生舊羽儀脩然一見識心期曾從譜牒知名久與德尹庚辰同年未覺風塵筮

宦遲劇邑簿書迎又辦冷官門戶少人持煩君蔭及先賢澤京北岡阡忠惠祠

先京北公賜城在江干范村外曾王父鍾忠惠公祠堂在西湖第一橋皆屬管內

齒痛借用昌黎韻

我年五十時落一牙一齒故人傳良方盥用井花水餘存幸牢固自爾將及紀
午餐漱方撤曉枕扣而起清比啄木聲硠硠徹人耳寧知衰老候疾苦不由己
積火壞陳齟浮陽發頰飮冬來忽擁腫罅縫生礫碗難憑藥醫治平聲最怕物觸
抵苦開酸兩頰亂動憎食指平吞有哽咽礙嚼無軟美旁觀不知難相勸進七
匙黃耆半甌粥舌在僅可錫連綿五晝夜腫赤乃漸止痛定得動搖老夫翻自
喜韓云吾亦云次第將落矣平生滋味薄藜藿徒累爾時至適摧殘在堅宜有
毀百骸推一例此蛻已久委試看葉經霜終無戀枝理

初冬集春暉草堂賦得菊殘猶有傲霜枝十二韻

黃菊將殘候嚴霜戒令時亭亭當晚節冉冉閱秋期正使孤花秀何妨衆葉萎
倚衰猶崛強競賞故參差澹入高人目幽惟冷蝶窺似曾霑雨露終不傍樊籬
搖落芳心見低回客土移楓丹非本色竹翠是相知繞徑香雖淺登堂影亦奇
白衣誰送洒青女解催詩性在休嫌傲寒多莫漫欺重陽高會少剩取一枝枝

擬樂天一字至七字體以題爲韻分得簾字

簾傍檻依檐防客見避花嫌平鋪湘簟斜搭吳襜額飄風細細鈎映月纖纖更無人處垂地但有香時透奩試問陰陰芳樹底後堂玉笛是誰拈

十月望後前輩周桐野同年王樓村雨中過槐窠看菊留小飲明日桐翁以詩見投次原韻二首

老瓦盆中花十本上槐街裏屋三間眼前此景殊不俗輦下幾人能愛閒我已
掀泥除蘚徑客方冒雨扣柴關寒林瘦竹蕭蕭意着片疎籬卽故山
土鏗無烟硯欲冰一歡邂逅得何曾詩如老將渾無敵花到殘年亦少朋紙閣
留香清四壁畫屏肖影澹孤燈真饒酒醜難拋在未敢多邀入社僧

題湯西厓前輩出關圖卽送赴天府丞任六首

中原桃李盡門生官比冰壺徹骨清此意九重非不達又持文枋赴陪京

奉天

丞兼督學
政故云

燕雲東北是重關唉指飛鴻滅沒間天與先生開眼界自吟詩過十三山

里社枌榆接 帝鄉同時卿相半南陽居民老不知兵革耕徧松桓舊戰場
沙蟲猿鶴總秋埃考證真須著作才別着畫圖車幾兩東都少尹載書來
荒寒杞菊咲齋廚山海中間物產殊不獨秋原饒雉兔八梢魚賽四鯁鱸
西風獵獵捲雙旌別路秋光雨正晴前隊朱衣非俗物爲君聊壯出關行

題紫滄醉吟圖小照三首

落花風裏髻交垂山谷前身定牧之綺語多生留一句醉圍紅袖寫烏絲
朝 賜黃封夕奏詩玉堂人物數同時如何袖染天香後偏愛科頭曳履姿
醉裏清吟眼界花樂天猶作少年誇證因亭上新翻偈枯木寒灰別一家

古詩

花開昨夜雨花謝今朝風造化故無私循環一氣中舉舉少年子彈指成衰翁
翁衰從少得乃復憂兒童

題翁樹服別茶圖小照三首

小團龍鳳碾初勻面首膏油苦鬪新修貢亭荒官焙少輸他一片火前春

湯老懸知客亦佳清風兩腋是仙才
花瓷不少纖纖捧辛苦磚爐自煑來
君顏白晢我華顛猶記騎驢並入燕
重向茶邊論臭味出山泉愧在山泉

盧六以庶常自藩邸入直 武英每乘小車以詩索和

輾轆勞薪五稔餘入騶雖乏勝騎驢
伐輪自信餐非素代步何妨進稍徐
旁挂鴟夸應貯酒中安狷坐好攤書
多君博物張寬比定有人占第七車

送宋蘭暉庶常養親歸商丘兼呈漫堂先生四絕句

歸途幾見着先鞭祖道回頭僅隔年
去秋送太宰公予告旋里贏得旁觀增太息此行真箇

是神仙

長假緣知為老親隨身匹馬兩車輪
較量白傅香山社膝下今多奉杖人
出專方岳入蓬瀛小宋文章又擅名
獨脫朝衫歸養志宦情付與二難兄

薄雪初消柳未絲行期預遣報西陂
羨渠到日逢元日歲酒先拈第一卮

得東亭弟滇南書知補授太和令作詩志喜

送爾衝炎出國門第于五月抄出都半年迢遞憶征軒
星埃路脫千重險冰雪書來一

笑温官舍向來多北戶王程從此少南轅家聲定有蠻人識身是前朝小諫孫

明嘉靖朝先高祖在諫垣疏參分宜相杖謫定邊尉

從廟市買梅花水仙二盆口占二絕

取意原從冰雪間水邊林下總怡顏黃花過後無聊賴又破先生一掬慳
根株高下手親栽嫩蕊多憑火力催好與冷官添暖熱一房紅日看花開

答破川程子和

有才如此我應求慙愧篇章屢見投愛說項斯長在口自逢東野欲低頭苦心
豈少知音識佳句殊難率筆酬期子修途須努力莫憑嗤點逐時流

除夕前四日宮怨堂寓齋消寒雅集次東坡答段屯田韻

平生區中緣足迹迹天下半自隨廢乘秣坐致籠禽歎去日行已多後期把難玩
職雖典文墨官肯羨黃散冷澹作詩人謹譁釃酒伴擊擊街鼓夕喔喔隣雞旦
葡萄點羹湯鮮腴釘梓案狂吟詞跌宕衆舞影零亂憑誰扶雅輪於我奉沃盥
營身有底急見事何妨緩壯懷付消沈老學資講貫買生蠲細故韓子就新懦

欲回天地爐重扇陰陽炭貧因思拔宅愛有歌適館幾時解嚴寒此會得餘暖
甘從百罰醉聊博一笑粲

次潤木除夕感懷韻四首

窮年趨走不辭頻休澣聊除半日塵
武英節假後復入直內
廷今日午間始回寓七秩將開吾向老

半生習嬾爾無倫屋如參廡東西住樹接斜街上下鄰
唉把屠蘇甘最後白頭

何事肯先人

病鶴摧頽戀赤墀尚憑瘦骨強知時早梅破臘心相許
殘菊迎春事亦奇
瓶中菊花

自十月杪至今尚
未萎亦一奇也賓戲客嘲從嗜嗜人趨我步儘遲遲
枯枿三百多平路莫鬪

新翻巧手碁

疎疎微霰墜無聲隨分招呼得合并陋室然薪為蠟炬
荒廚煖酒用茶鐺語便

應對宜鄉友夢失悲歎長道情錯料官中有生計依然共爾舉家清

風流幾輩記遊燕往事依稀劍鏤船細數流年殊警爾
每逢遠計一悽然
半年來吾

鄉陳少司寇汪少司農竹垞
朱先生陳太守六謙皆物故龍蛇屢厄天何意
蜚駟相依老倍憐正自欲歸猶

未得妄思駐景作巢仙

敬業堂詩集卷三十七

庚寅元日試筆戲作天竹
傷西屋前望見和元日試筆詩再疊

立待前一夕小飲西屋戲書三疊韻

湯翰時表弟次前韻并寄四疊韻

別者下
空而編卷答

湖中
同奇聞之各以詩相賞賦為一首

六叠前韻
十叠前韻答劉大山同年

西屋
試筆
試筆

得句字
八叠前韻
試筆

公梅
試筆
試筆

試筆
試筆

試筆
試筆
一枝插菊花烟中

...

...

文正公集卷之四十四

...

...

...

...

...

...

...

...

...

...

敬業堂詩集卷二十八目錄

槐籜集下

庚寅元日試筆戲效樂天體

湯西厓前輩見和元日試筆詩再疊

奉訓

立春前一夕小飲西厓寓齋三疊前

韻

湯納時表第次前韻見寄四疊韻

劉若干前輩枉和新篇五疊前韻奉答

瓶中菊花入春未萎西厓前輩樓村同年聞之各以詩相賀賦謝一首

六疊前韻答樓村同年

七疊前韻答劉大山同年

西厓生日再次瓶菊韻奉柬

試燈前二夕再飲西厓齋即席分賦

得鈎字

八疊前韻答同年吳南村

盆梅

若干前輩見和瓶菊詩再次韻奉答

試燈夕吳篁村同年招集陶然亭

雪後獨赴書局

戲為四絕句呈西厓桐野兩前輩

折早梅一枝插菊花瓶中蔣西君同

年繪二隱圖見贈并系以詩次韻奉訓

燕九日郭于宮苑密居招諸子社集演洪稗畦長生殿傳奇余不及赴口

占二絕句答之

題西君同年花果冊四首

花朝集忍冬齋月下飲汜光春用東坡定惠院月夜韻

分賦肅寧八月桃二首

題王海文修撰秋林讀易圖二首

幽蘭

淘渠

寒食詞

殿庭草

三月十八日曉出西便門至暢春園天始明

院長揆公於園池小洲上新構亭榭落成自賦四詩其末章專以見屬次

東謝原韻

律詠笥二十六韻

鶴雛和院長作

院長餉水鳥卵數十枚兼侑以詩次答

劉若千前輩招集聽雨樓用少陵重過何氏園林五首韻

予昨作詩從院長乞筍有馬軍煩走送之句院長謂余兼欲致酒也今日大風遣人餉筍及菊釀二壘以詩索和次答

院長以詩餉櫻桃次來韻

答

松花和院長

或云紫藤花蕊可瀹以點茶下酒從自怡園采一斗許試之香味果清絕

戲作一詩東陳南麓都諫周桐野侍讀兩家富有此花故以方法報之

題西君畫荔支圖二首

聽琴工吳觀心彈欸乃作歌贈之

院長餉竹筍蕨芽

題同年張嵩陸落葉詩卷後

文安王孝子詩奉和安溪相國作

新竹次院長韻

盆中繡毬不作花者九年矣今夏復放院長有詩索和次原韻

謝院長惠西洋蒲桃酒

題盧六以庶常抱經圖二首

送李敬齋庶常請假歸里

送梅雪坪出宰泰順二首

張嵩陸有賢子三十而夭屬作挽詞

送同門孫斗文赴任武緣

送同年喬松華赴任永福

送楊次也赴平涼太守任二首

塞外二色芍藥五月始花院長揆公

采得並頭一枝屬蔣西君繪圖兼以唱和詩寄示次來韻

送周桐野前輩督學順天

內閣北垣下有老楮一株歲久成陰

相國澤州公機務之暇時一憩焉泰州禹之鼎繪成楮窗圖公自題七

律二章命門下士繼和敬次原韻二首

贈別郭于宮

同年錢綱菴舉幼子年月日皆與余

同因命名同初六月八日為湯餅之會席上戲贈

送同年唐益功出宰德清十八韻

送同年宮書升赴任臨汾

送同年歸既垣之任西華

藥苗初茁

暴雨

院長從口外寄餉灤帥十二尾雨窗

憶舊吟成七言長律十六韻

送沈岱瞻赴任寶坻

送大司寇張景峯前輩罷官歸韓城二首

九十翁王德園輓詞

送同年朱明原宰永城二首

送馮文子南歸時改就教職

六月杪于庭前後種竹兩叢入秋積

雨忽生笋五株旬來森然成竹矣時方移寓作詩志之

別雙槐四十韻

敬業堂詩集卷三十八目錄

...

...

...

...

...

燔業堂指葉卷三十八目錄詩一連...

...

...

限變賦四十難初六月八日...

兩公主簿王林向來森然...

登謝文子南疆知微燔燭...

次十餘王齡國壽詩...

登大同寮魏華華南望馬官...

敬業堂詩集卷三十八

海寧 查慎行 悔餘

槐移集下

起庚寅正月 盡閏七月

庚寅元日試筆戲效樂天體

朝回剝啄門無客家會團圍巷有鄰
潤木寓相 去一里許 簷竹半經霜壓捺盆梅全得雪

精神顛毛白後無多許花甲周來第一春除却過頭年六十另編詩藁起庚寅

湯西厓前輩見和元日試筆詩再疊奉酬

不愁遼海阻音塵
西厓初自奉天 少尹陞任回京 劇喜還朝作並隣客疾過年當勿藥新詩拈

筆果如神溪山偕往知何日步履相隨要及春只恐官高歸未易釣磯端合付

徐寅
西厓將以疾告故云唐徐寅歸老延壽 溪作釣磯探龍二編僕意以此自況也

立春前一夕小飲西厓寓齋三疊前韻

歸休終傍漳南宅
西厓近買宅海鹽 余亦將移居於此 偏仄今充巷北隣無事不嫌頻扣戶坐談

常恐太勞神燈前對影流連夕花底開懷準擬春探借盤筵報佳節先庚三日

午辰寅蘇氏易傳先庚三日午辰寅也後庚三日子戌申也

湯納時表第次前韻見寄四疊韻

衰遲會合且風塵下榻閒坊近接隣每憶兒時纔轉瞬不談舊事怕傷神雪封

村路梅花夢酒汎行廚柏葉春壽骨不知相似否與君初度再庚寅范石湖六十一歲自

賦詩四人同丙午初度再庚寅第與余同年生故引之

劉若干前輩枉和新篇五疊前韻奉答

多年文酒追陪地君有餘波每照隣曾向桓驄展風力愛從嵇鶴領姿神校書

館閣閒中老夢草池塘句裏春敢擬唱酬稱執友後先官簿託同寅

贈回瓶中菊花入春未菱西厓前輩樓村同年聞之各以詩相賀賦謝一首

兩枝黃白膽瓶中猶記秋深折淺叢能伴幽人過殘臘始知大地有春風延齡

疑致神仙訣勺水終資造化功苦被蚤梅催替代虛慚矜賞兩詩翁

六疊前韻答樓村同年

不分君貧我更貧何曾祭竈請比隣筆花入夢能為崇銅臭如錢豈有神陋巷

幾家還賀歲東郊昨日又班春典衣纔了尋常債踏麩重思趁上寅造麩用七月上寅見

長慶集 參差前公賦地我... 詩酒劉家代有人不煩事事乞諸隣篇章分得隨州派釀法爭傳白墮神來詩用買

詩酒劉家代有人不煩事事乞諸隣篇章分得隨州派釀法爭傳白墮神來詩用買

以此答 樂歲人情初見雪他鄉時序怯逢春憑君對我誇張少莫把生申比

降寅大山丙申生偶 借用嵩高語

西厓生日再次瓶菊韻奉東

昏參旦尾報方中又見蘭芽茁雪叢初度年年作人日官居處處舉鄉風閒吟

喜帶松篁氣却病何關藥餌功要識脩然出塵意散花方丈淨名翁

試燈前二夕再飲西厓齋即席分賦得鈎字

簾閣春寒未上鈎重來竟夕為淹留印泥開酒波紋汎雪窖移花蘊火柔出漢書召

信臣 才小媿參諸葛坐格高可怕老元偷樂天詩每被 回思三十年交舊幾個

如新到白頭

敬業堂詩集

卷二十八 一一 中華書局聚

八疊前韻答同年吳南村

與君日日為同直，千萬何須更買隣。
筆退管城堪作冢，針傳繡譜豈無神。
青袍似草風驚曉，蒼鬣如松雪鬪春。
好乞上元連夕假，重呼儕輩會三寅。

明日十二方逢寅同

年又有公會

盆梅

姑射有仙人，冰肌故綽約。
歲寒守岩谷，風雪從饕虐。
無端被巧匠，栽接移根脚。
本是桃寄生，而含梅跗萼。
經冬傍花窖，漸亦喜熏灼。
昨登廟市來，帶土入城郭。
千錢買一本，手為解其縛。
我室清如冰，依然愁冷落。
瓦盆一小器，局促焉足託。
本性倘可回，相期返丘壑。

若干前輩見和瓶菊詩再次韻奉答

結為三友歲寒中，松竹行邊菊有叢。
併與梅同禁朔雪，不教蘭獨占東風。
衰遲光景參差信，冷澹生涯長養功。
此段閒情應入畫，畫將林叟配陶翁。

時方屬蔣西君補圖

以折枝梅花作配

試燈夕吳篁村同年招集陶然亭

春來日日喜春晴邀我同遊不夜城燈火參差亭北面管絃清脆月初更探花
不減年時會對酒偏傷老大情五十二人官太冷

癸未同年在詞館者五十二人

多君獨着繡

衣行

吳時由戶部郎改授侍御

雪後獨赴書局

銀鑰初開右掖門最先衝雪到朱軒鴉穿鬢松翻林影鴿下罌恩印爪痕鈿砌
凝冰防履滑茸裘呵凍就爐溫此時忽動撚鬚興憶着橋邊竹外村

戲爲四絕句呈西厓桐野兩前輩

碧海鯨鯢杜陵老虛空駮駟玉川翁後生不自量才力却道同遊羿彀中
顛倒波濤拆海圖補將百衲綴諸于天機雲錦非鴛繡縱有金針度得無
百年神物在泥蟠俗筆多從委蛻看誰遣通身鱗甲活畫龍容易點睛難
不知此曲唱誰家第一燈傳梵釋迦妙處可容添語句故應微笑對拈華

折早梅一枝插菊花瓶中蔣西君同年繪二隱圖見贈并系以詩次韻

奉訓

秋英春蕊忽交枝耐久翻成邂逅期高士累朝多合傳佳人絕代少同時不爭
犯雪開能蚤頗訝經霜萎獨遲何物報君圖贈意亟來花畔對傾卮

燕九日郭于宮苑密居招諸子社集演洪稗畦長生殿傳奇余不及赴

口占二絕句答之

曾從崔九堂前見法曲依稀燄段傳不獨聽歌人散盡教坊可有李龜年

憶己巳秋

事

上客紅筵興自酣風光重說後三三老夫別有燒香曲憑向聲聞斷處參

題西君同年花果冊四首

淡墨染花頭花心點焦墨不似戲猫圖寫生煩設色

徐崇詞有芍藥戲猫圖

畫竹葉欲密畫蘭葉欲稀破空三五筆筆勢如飛

南村有諸楊不數陳家紫目矚朵吾頤朝來吐饒水

蒲鴿青連蔓移根入塞難曾從天上副賸許畫中看

禮記為天子削瓜者副之

花朝集忍冬齋月下飲汜光春用東坡定惠院月夜韻

始雷送雨作花朝午後微雨初聞雷聲片月流空轉清夜故人招我動春酌繫馬門前古

槐下初聞鏘器隔窗鳴忽卷湖光入懷瀉碧壺貯液清漱灑黃穉流膏香穉亞

淡交滋味均有無久客杯槃通假借自然真趣出酬勸豈比恆情論報謝篤嗜

誰分南北篤羣謹會惱東西舍已拚豪舉任投轄待析狂醒須挫蔗張協都蔗賦挫斯蔗

以療渴從君泥飲痛不辭與世周旋老尤怕何當口業並消除庶免人傳供笑罵

分賦肅寧八月桃二首

玉帶河邊花似錦南陽曠畔實如拳不嫌雪黍年光晚長記豳風剝棗天

六月關南進荔枝西風北產熟偏遲行宮瓜果中秋宴珍重金盤拜賜時

五年前扈從口外會蒙賜食此品

題王海文修撰秋林讀易圖二首

夢裏吞來記得不韋編重對纈林秋三爻已足科名用一半還須向上求

君家易學吾能說前有通玄後發微晉王長文撰易通玄經唐王子安著易發微世俗但傳王輔嗣

不知理數本同歸

幽蘭

蘭兮蕙之族幽者特早芳見別疑似間獲升君子堂初來羞自獻既吐還深藏
氣味則相親無風亦悠颺老禪適靜坐鼻觀通微香

淘渠

京師飲汲井城減但流惡家家門前溝歲歲費淘摸九衢豈不寬所向防失脚
東風連日霽桃李嬌陽春看取溝中泥還爲衣上塵衣沾胡足道奈此塵污人

寒食詞

鈿車隱隱走輕雷兒女相將上冢回不管小桃攀折苦競攜春色入城來

題吳寶厓西溪梅雪圖二首

苔枝殊冷澹况乃壓枝雪此時西窗琴孤絃凍應折知音眼看少古調誰見別
聊爾動微吟含毫寫清絕硯水渙渙散酒耳烏烏熱多謝造門人毋來污吾潔
我愛新城詩一緘寄冰溪雪山如在眼欲往屐齒折畫圖與真境莫作強分

別興到神亦俱雙清兩奇絕相逢山中侶一笑回暖熱洗我筆端塵從渠噴太
潔

殿庭草

東風吹綠花飄縫下有陳根幾百年惆悵履綦遺跡盡雍和門外浴室前

菊苗

去秋所種菊牆角委土梗老眼無留花過時寧復省旬來春雨足百卉擢條穎
嗟爾一寸根勾萌亦自逞回青識故處閱白感俄頃九陌交輪蹄千林競桃杏
吾苗尚毫末卽事笑幽屏

三月十八日曉出西便門至暢春園天始明

夜枕過雷雨薄雲開朝晴起乘殘月影快作西郊行好風從東來初日烟中生
村村花柳氣寺寺鐘魚聲草色旣芊眠溪流亦洄瀠于焉愜野趣警爾遺宦情
長恐芳訊闌坐聞鶉鳴鳴白頭誰料理撫景中怍怍

院長揆公於園池小洲上新構亭榭落成自賦四詩其末章專以見屬

次訓原韻

面面軒窗盡枕流轉於空闊得深幽負山有力輸鼇背畫壁何年倩虎頭皓月
激波宵似晝疎簾清簟夏先秋尤宜落日平臺上遠景蒼茫咫尺收
四首新詩自落成尙留齋笏待余名雲烟物態論今昔風雨心期閱晦明潑刺
紅鱗當檻躍離襪白鷺導舟行人間擾攘知何限不博先生笑絕纓

只擬松高對阮論朝回一意避塵喧瓣香自覺心源淨明鏡端除眼界昏菱葉
牽絲縈瓦影桃花拍浪沒橋痕此中何處容殘客應許扶藜獨扣門
神問身心影答形籬杉徑竹對亭亭開編一盞供浮白排闥千峯與送青鶴跡
愛穿花底覓漁歌長憶雨中聽年來自嘆才將盡擬向詩仙更乞靈

從院長乞園中新笋次昌黎和侯協律詠筍二十六韻

及見初移植清陰漸滿軒万竿殊不惡五畝遽爲煩篠蕩年將老篔簹定有孫
遠旬雷啓蟄前夜雨翻盆驗長纜分寸爭高自曉昏密侵苔錦厚尖透麥風温
鳳咮形粗具龍雛勢欲騫攢攢犀角利隱隱豹斑存行列雖無次縱橫亦有垠

合充嘉客饌何待老饕言趁取猶含籜兼當未易根斫教開鶴徑養祗護羝藩
幾費輕籠貯曾勞重馬奔千錢空市肆束帛各丘園昔享山僧供今希地主恩
須防行礙屐那計避踰垣毫豈資薑桂香應敵蒞蓀釜烹憐久缺臺餽望頭番
賤嗜終成癖奇珍且勿論人情知貴少物類要刪繁蠹簡餘殘債東坡詩多生
味蠹簡食笋
乃餘
饑腸待飽殮堪嗤惟食肉所忌亦當門正使因風折何如帶土掀解饒勝
嚼竹勸醉抵留髡頭朵頻搔首詩成乍悅魂馬軍煩走送炊玉迨朝暾

鶴雛和院長作

太息胎仙種無端墮卵生羽毛存逸性風露學長鳴已作離羣立還看傍母行
鵝王爲擇乳雞粒莫相爭

院長餉水鳥卵數十枚兼侑以詩次答

菰蔣深處有飛翰百族成羣影不單遙想母歸雛已散誰知巢覆卵猶完君緣
野味分相餉我愛溪毛聚作團擬倩家禽爲啄菹勻圓未忍淪登盤

劉若干前輩招集聽雨樓用少陵重過何氏園林五首韻

白髮春垂暮昏昏日校書忽聞傳尺牘招我過園廬簾引新巢燕床拋舊佩魚
此中饒勝賞大可賦閒居

締構尤加密規模故不移種花多結子看鶴又生兒樹影搖朱舫苔痕上綠陂
自然饒野趣高下有疎籬

高閣披襟處斜陽脫帽時流連今夕酒惆悵去年詩藤亞交頭杖蛛垂拂面絲
獨來吾不厭況與故人期

頗憶家鄉趣閒談味更長露梢開粉澤雨葉展旗槍久客徒漂梗浮生劇夢梁
蹉跎十年計種樹恐倉皇

主賓原略分師友亦忘年愛讀先生句如聽古澗泉狂猶能奮袂老只想歸田
正爾良非易回頭各惘然

予昨作詩從院長乞筍有馬軍煩走送之句院長謂余兼欲致酒也今
日大風遣人餉筍及菊釀二壘以詩索和次答

乞筍何當更致醪唉余毋乃太貪饕頓教野老寒疏賤不怕隣姬酒價高一飯

解苞登玉饌

黃山谷謝人送笋詩都城一飯
款白玉又云豹文解籜饌寒玉

三升出甕湧詩瀟

孟郊詩云詩骨
聳東野詩瀟瀟

退

只慚指動真踰分仙爪能從背癢搔

院長以詩餉櫻桃次來韻

小摘枝頭鳥未殘遠從筐筥照吾盤珊瑚碾出千絲網鉛汞燒成万粒丹憶舊
如霑門下賜嘗新合讓野人餐條冰況味公能識熱不須蠲要辟寒

院長折園中雜花見貽以詩索和次答

霧裏看花未屬厭煩分春色到窮簷儘教語燕來窺硯便有遊蜂伺捲簾俄影
自搖殘燭短餘香欲度晚風尖多生結習除難盡容易波羅一咲拈

松花和院長

謾謾風吹墜粉乾似花仍不作花看滲成竺國瞿曇面染得華陽道士冠鶴翅
勤來因掃拂蜂須難覓爲高寒神方果有輕身訣斲取陰脂試共餐

或云紫藤花蕊可瀹以點茶下酒從自怡園采一斗許試之香味果清

絕戲作一詩東陳南麓都諫周桐野侍讀兩家富有此花故以方法報

之

牛酥煎牡丹方法傳自昔藤花故見遺開謝任狼籍客從山中來去此堪齟齬
貧家乏餽釘一味忍輕擲飾庭雖無緣謀野乃有獲郊園腓百卉高蔓走千尺
瓔珞垂紫英晴光燭晨夕畦丁幸許致爛熳助采摘一一柳貫魚頃筐手親劈
天生物無棄祇在人愛惜于湘味食經試以己意逆水淪既良方火攻非下策
屏除蜀椒辣點綴吳鹽白果然發芳鮮出釜登几席豈惟悅我口亦用酬吾客
人誰知正味事喜出創闢明朝馳短箋鄭重告詩伯兩家富旨蓄迨此花滿格
俯笑王濬仲營私鑽李核仰慚陸魯望未免杞菊癖

題西君畫荔支圖二首

四月則太早七月則太遲上品貴適中熟當小暑時其株皆合抱賴實高纍纍
色香與味三妙取帶葉枝金盤薦華屋不以遠見遺向非玉堂仙誰寫冰雪肌
冰雪故難剖略煩點臙脂如披蔡家譜而讀蘇公詩

粵人既夸粵閩人亦夸閩君少飮粵齋吾衰飽閩珍兩舌雖不同知味諒乃均

別來各踰紀夢想猶隔晨多君繪成圖見畫如見真又復索題句與傳畫精神
一枝風露鮮齒頰回津津何必三百顆長作嶺南人

聽琴工吳觀心彈欸乃作歌贈之

九疑之麓瀟湘之潯碧羅帶繞青瑤簪元音一散万千古墮入泱泱氣鬱沈漁
翁鼓棹如鼓琴晚遇元次山柳子厚爲知音却將欸乃曲寫出烟波心雨濛濛兮木

榕榕鷓鴣低飛猿叫露一聲兩聲斑竹裂十里五里江天陰秋風掠岸涼吹襟
思婦夜鼓斷續碁忽然日出花滿林黃鸝紫燕春悄悄遊絲飄空幾千尺山長
水闊無古今乍高乍墜勢莫禁愈近愈遠端難尋不知覲面者誰子恍若獨坐
成連海外之孤岑吳生絕技迺至此正氣所感感更深我思欲學奈衰老心粗
指硬恐不任膏肓稍以砭石鍼有耳肯聽桑濮淫吁嗟乎吾之知吳蓋已淺聊
託寂寞滄浪吟

院長餉竹萌蕨芽

春山筍蕨本來甜

蘇詩慚愧春山筍蕨甜

難得城中二者兼一笑開籠何所擬小兒拳配

玉纖纖

題同年張嵩陸落葉詩卷後

詩境全從寄託深開編靜對見君心行收珠玉揮毫手往和風霜落葉吟竹老
爲椽仍中笛桐焦入爨始成琴五千言領知希意不要人人盡賞音

文安王孝子詩奉和安溪相國作

青青松柏樹蟠根上垂枝人生斯世間孰是無父兒父子有常性曰惟孝與慈
本與生俱來平平理無奇奈何千百載孝行傳者希將母世教衰天性有淳漓
其或得天厚一念不自欺精誠未徹間天故靳報施艱辛方歷試陰隲姑遲遲
及乎感遂通較若稱銖鎰適與人事會彼蒼本非私試看農家子任真初何師
志壹氣乃充人定天爲移文安一小邑中有孝子祠王姓原其名厥族蓋已微
生小但依母不知父爲誰母旋告之故朝夕恆涕洟稍長甫娶婦長跪與母辭
兒今欲覓父有婦侍寢幃苦語挽不留隻身望天涯眼前盡岐路俛俛將安之
路窮乃涉海夢兆如著龜掉頭別母去躡足隨爺歸未歸敢自必歸到翻成悲

里鄰賀羊酒官長旌門楣團圞逮眉壽仍世開曩基到今二百年代易族姓滋
此事載邑乘四方或未知安溪賢相公畿輔舊保釐訓俗務根柢仁親以爲期
表彰先朝事欲令來者思手立孝子傳復爲孝子詩詩中何所云代述孝子詞
讀之盡流涕恍然目擊時康叔生奉母曹娥死負屍敢請追配古大書勒諸碑

新竹次院長韻

青瑤流影照明珣陶詩亭亭明珣照盡放梢梢出屋寬粉澤未乾宜露濯錦棚初脫奈

風寒輕陰拂地應加密秀色迎人尙可餐附入戴家新譜內釋名稱草恐難安

爾雅釋草篇笋竹萌山海經其草多族厥族多箝皆以竹爲草類故戴觀之竹譜云事經聖賢未有改易然稱草良有難安

盆中繡毬不作花者九年矣今夏復放院長有詩索和次原韻

久留生意未爲薪近報唐昌蕊又新碎剪有痕千瓣雪密攢無縫一團春壓梢
自重非關鳥帶葉全低欲礙人記得月燈毬樣似白頭重見意猶親南部新書每歲寒食

新進士于月燈閣置打毬之宴東坡詩所謂曲江船舫月燈毬也

謝院長惠西洋蒲桃酒

敬業堂詩集 卷二十八

九 中華書局聚

妙釀真傳海外方龍珠滴滴出天漿醍醐灌頂知同味琥珀浮餅得異香直可

三杯通大道誰教五斗博西涼平生悔讀無功記誤被村醪引醉鄉

題盧六以庶常抱經圖二首

三傳何妨有異同抱經莫學玉川翁買家訓話韓家論可少盧家與折中

漢賈逵有

三家經訓話魏韓益有春秋三傳論十卷

章句人人守一經可憐祇用博科名多君獨有膏肓癖不傍長檠棄短檠

檠字本屬

上聲宋人多叶平聊復借用

送李敬齋庶常請假歸里

與君書局同晨夕不道陳情爾許難

李去秋便欲乞假因成書限嚴今方為啓奏

愛日光陰雖未晚

望雲懷抱幾曾寬無言可慰三年客此去全勝十政官

用章孝標詩語

為報眉間見黃

色高堂一笑定加餐

送梅雪坪出宰泰順二首

行作折腰翁吟邊憶謝公攜家千里近得邑万山中椒旂通閩賈魚鹽走

去聲海

童流傳永嘉學亟望起儒風

泰順温州之屬縣明正統朝始置地連甌越民俗朴魯未有以文章科第起家者故云

竹垞門下士

君爲竹垞先生辛酉江南所得士

爾雅倍堪親前輩詩無敵多才畫入神一官貧

寄祿萬卷老隨身去去君何恨徒傷久滯人

張蒿陸有賢子三十而夭屬作挽詞

短生寄長世如浮亦如沈高人付達觀旦暮猶古今下士重其寶服食延分陰
相去九牛毛奚翅尺與尋造物本無物榮枯隨所任奈何才不才分量費酌斟
才者或夭折不才乃森森此枋竟誰持報施昧善淫嗟嗟張氏子質秉玉與金
十五工文詞長老咸歎欽二十舉鄉貢恆苦疾痰侵夙慧天所隲道根種何深
自知不永年瀟洒託清吟三十遽謝世一笑遺冠簪斂以僧伽黎反乎尸陀林
其生類知道沒豈無知音我作哀挽詞以慰乃父心

送同門孫斗文赴任武緣

百戶猺獞賦孤城瘴癘天茫茫赴長路草草別同年剋日有嚴限之官如左遷
桂林嗟已遠南去又三千

送同年喬松華赴任永福

碧水丹山路迢迢六七十桂林聞少瘴荔浦喜通船吏隱安荒外人情薄眼前

孫郎行更遠作計幸周旋

謂斗文

送楊次也赴平涼太守任二首

辛苦河隄使初停杵橐聲三年方上計五馬遂西征齋釀葡萄味沙陀首舊程
勿辭乘障遠領郡際昇平

開府吾鄉彥勳名策府存典刑傳太史科第繼文孫世以儒林重官仍露冕尊

平生期望意垂老屬恩門

令祖司馬公開府黔陽僕在幕下受知最深

塞外二色芍藥五月始花院長揆公采得並頭一枝屬蔣西君繪圖兼

以唱和詩寄示次來韻

草沒烟埋定幾時忽驚紅白出連枝號韓合隊方稱貴姚魏分標未足奇若使
入宮應薄妬却緣出塞更多姿畫圖與釋從前恨兩首詩傳萬口知

送周桐野前輩督學順天

先生人中龍天與君子性平時頗跌宕臨事乃剛正憶昨典浙闡量涵江海淨
無私消滂燄冰雪久彌瀨至今桃李門得士稱最盛數椽居帝里貧過滎陽鄭
俸錢付書估斗酒謀主孟時復召朋儕琅琅發高詠彈丸躍奇句傳寫寧待竟
李杜韓白蘇篇篇資考證他文率稱是手筆誰能倩以此徹 主知蓬山負無

位趨營幾新輩時世梳粧靚恬澹其素然卓哉規品行國家設遺補拔擢半長
令庶常間改授歷職例不更敢云著作作庭遷轉薄諫諍於公實久次事異初徵
聘比者適乏人銓曹列名請去聲終焉寢前議上賴 天子聖宮坊俄晉秩侍讀

繼申 命小試惜宏才留爲作人慶使星不涖蜀畿輔觀爲政古來豪右區當
代儒風競文通山後族武達代來姓一一操管從妍媸歸皎鏡將空冀野羣往
矣執衡柄絃琴視拂拭匣劍待磨銍苞苴自不入籬棘何妨摒必若振先聲務
須釐積病朱衣羣吏導絳帳諸生迎詎非稽古力榮寵一時併公貌謙愈冲公
懷直且勁和光得人愛巖氣生我敬良辰乍招攜同人於端午日臨別心怲怲

城南好亭榭快若披畫幃每來必遲留天水互激暎飲徒散將盡自此稀游泳

計公還朝日吾已理歸榜贈言抒所懷甘被俗嘲評

內閣北垣下有老楮一株歲久成陰相國澤州公機務之暇時一憩焉
泰州禹之鼎繪成楮窗圖公自題七律二章命門下士繼和敬次原韻

二首

洵知黃閣異人間獨樹能高便不頑瀟灑坐看移日影婆娑行愛繞苔班堂餐
撤後仍開卷 賜杖攜來正押班爲報官居如邸第太平機務有餘閒
自蒙一顧覺恩深地傍絲綸氣象森樗散不教成棄物栽培聊許效清陰偶然
此樹同溫室豈少餘材聚鄧林數仞宮牆窺不見媿從下里和高吟

贈別郭于宮

我初耳君名識面悵猶未吳中忽逅邂逅衰懦增慨愼纏綿一臂交傾倒兩心既
顧歡同年舊莫逆笑相謂

辛巳四月君偕書宣
至姑蘇始訂交焉

謂是我輩人拔茅當以彙出其

囊中什字字扶肝胃豁達淮海風鬱蟠河岳氣儕觀狎唐宋方駕希晉魏獨立
千丈姿昂然表凡卉私心驚且喜固是吾所畏竭來京洛間領略彌有味顧今

不可作語及必長喟孰使顧不亡得君深自慰時時小扣擊枯槁需一溉亦復
不靳予情同采葑菲生逢右文代多士雲鬢瀟湘賦何涓古鏡吟潘緯公車
召方朔書學徵米芾君亦預承 恩南薰食官餼明堂儲杞梓丹腹視塗墍大

海終掣鯨蘭茗聊集翡翠舉場昨俯就抱璞仍剛跬多君失意來辭色少怨誹平
生學問力胸自判涇渭頗怪窮孟郊甘稱溧陽尉驥雖仰芻秣鴻肯離羅罽計

決勇告歸會機適天乞叶去會機出唐書劉文靜傳 金源舊文獻蕪沒幾蒿蔚上賴野史翁

流傳得髣髴補亡千載下自任一何毅零落四千篇緝紉成禴禩君於中州集之外復搜輯

金人詩二千餘篇進呈御覽 圖經佛道藏搜採靡不暨經 進卷倍前 乙覽爲增歛隨身

給書局紙價往應貴汗漫鏤板期艱難治裝費若人富才藻所乏乃資扉崔硯
幸勿焚萊服行且衣歸與洵可樂貧也何足諱綠楊暗河橋萬樹蜩螿沸南風

吹祖帳好雨洗林燠掉頭君其仙灸背我如熨倘念酒人遊尺書及塵堊

同年錢綱菴舉幼子年月日皆與余同因命名同初六月八日爲湯餅

之會席上戲贈

老錢年踰五十矣二月抱孫五月子今年二月錢先得孫子生距我六十年月日皆同時

異耳人生墮地如轉環風雨小劫須臾間釀錢去作湯餅會為爾聊破囊中慳

我今蚤衰似蒲柳玉雪蘭芽羨渠有生兒若要與渠同一笑還須十年後綱菴小余

十歲故戲語云十年以後安知余不生一子與君稱同年乎老繅造此口業罪過罪過

送同年唐益功出宰德清十八韻

荆川嫡派承家學經濟文章孰比優忝附同年成進士欣看鄰境得賢侯是邦
約略吾能說此去艱難爾勿愁小吏兩三迎水遞長亭五十接鄉郵菰蒲影裏
攜琴譜菡萏香中發櫂謳到邑不離黃篋舫浮家且傍白蘋洲俗經旱潦需仁
政天與谿山賦近游千丈奇峯當案立一支健水入城流帆檣絡繹疑官路烟
火微茫辨市樓籬落鳩鳴茶足雨野田雉雒麥先秋風醒曉岸魚蝦賤葉暗農
郊桑柘稠碧甕村村工釀酒紅裙箇善操舟向來風物原如此比日流亡稍
復不開廩屢蒙 恩賑卹催科聊緩歲徵求瑟當急調絃須改藥遇名醫病必
瘳預想居民多喜色愧無贈策佐前籌蟻封豈合長馳駿雞割何妨暫解牛別

有虛懷人未識下車先為訪南州做座師少宗伯徐公方致政里居故云然

送同年宮書升赴任臨汾

班聯銓序五人俱捧檄娛親爾獨殊登第三年先老鳳得官千里試名駒蓮花

舊洞真仙宅蟋蟀餘風古帝都矯首共看汾水上一雙飛鳥是王鳧同年謁選者五人惟

書升得善地

送同年歸既垣之任西華

侯封兩襲漢東京後漢鄧晨鄧閻皆封西華侯事載本傳水經注專屬鄧晨者失考也百里今傳小縣名却羨鳴

琴來宓子真堪捧檄慰毛生太行北望渾連塞洧水西流不到城見說中牟壤

相接莫教卓茂擅循聲

藥苗初茁

一片苔封蝻螻橋汲從甘井手親澆金波處士如相過莫畫狸奴損藥苗圖繪寶鑑

宋李藹之號金波處士喜畫猫于藥苗間

暴雨

的瀝初聞傍枕幃忽拋響瓦万珠璣虹霓故壯崇朝勢草木羣蘇一震威漏屋
移床非故處破窗穿紙入餘飛雲開日出須臾事賸得新涼暫透衣

院長從口外寄餉灤鯽十二尾兩窗憶舊吟成七言長律十六韻

無端枕上豐年夢果有嘉魚致碧潯荷葉解包腴未減鹽花初腊味尤深入關

兩後蹄雙躩粥市朝來尾一金射鮒故知同井谷魏都賦雖復臨河而釣鯉無異射鮒于井谷揚條

豈必盡青林水經注蘄州廣濟青林湖鯽魚大者二尺可止寒熱每思長夏同垂釣不比嚴冬試落碇塞

柳柔條三尺踈灤河新漲半篙侵賞花作賦榮曾預貫笠披蓑力頗任躍藻莘

莘看得雋駢頭戢戢快生擒憶癸未六月扈從熱河釣魚事烹鮮屢飲天廚饌配酒兼叨內侍

斟憶乙酉丙戌夏秋之行宮侍宴事白首重回成往事素書頻剖荷佳音鮓封倍覺分甘厚

鐵化寧愁遠信沈長鉞人嗤緜是蒯直鈎吾敢曲為針尚餘截竹為竿手可有

臨淵結網心口業不停如宿債詩題纔到便微吟行當召客充梓案底用呼童

澆釜鶩饋食例應煩十五加餐還望使重臨儀禮少牢饋食禮魚用鮒十有五而俎今尚欠其三故結語戲及之

送沈岱瞻赴任寶坻

與君忝同年生長同里閭知君孰如我骨肉情豈但先公昔登朝名第南宮冠
鳳毛看再刷省吏識珂傘謂宜上金鑾繼世典詞翰却將著作手移畫紙尾判
得官向京東鳥鹵傍海岸古來畿赤地風俗率驚駢太剛慮爭勝過弱恐示玩
自從羅畢繁俯仰魚鳥亂須令靜以族毋致淪而渙雖殊南陽鄉圖牒行可按
業田湯沐 賜錯壤居大半莊戶接膏腴農疇雜耕爨并兼聽豪右鰥寡詎宜
犴人疑作令難簿領苦堆案子雖軀短小其氣乃精悍才長百事能所少非此
段望君朞月最許我一辭贊疑網破二三貞固事足幹初如迎刃解既過春冰
泮夏書納結服周禮掌灰炭瑣碎攬大綱豈其銖釁算情深不自禁語出背沾
汗芻蕘倘可收幸勿怖河漢

送大司寇張景峯前輩罷官歸韓城二首

朝典推糾職 皇仁體好生事關同列忌公視一官輕已抱回天意休高去國

名應同白司寇家世說韓城

白樂天以刑部尚書致仕按唐書本傳其先本家韓城

槐棘論三又雷霆竟獨當不聞 廷辯語自拜乞休章祖道千人帳秋風一葉

裝大臣傳軌範投劾便還鄉

九十翁王德園輓詞

上元人其孫元衡己丑進士

門風本是烏衣巷九十傳經比伏生壯日看花朋舊盡老年種竹子孫成

有子五人

孫七人

社中天與耆英壽身後人傳著述名存歿於翁兩無憾同時銘誄半公卿

送同年朱明原宰永城二首

淮徐封壤接芒野舊稱饒風俗鄴侯國人家薛疇橋近聞成巨浸行見布新條

膏雨隨車去謳歌徧黍苗

毫社來陳寔桐鄉得仲鄉苦辛憐舊尹

謂唐殿宣

慈愛播先聲世羨成名早官因奉

母榮古來循吏傳所重是書生

送馮文子南歸時改就教職

計偕憐七上屈就廣文甑舊事青燈外歸程白雁前救貧無善策攬鏡得衰年

杯酒平生分臨歧意缺然

六月杪于庭前後種竹兩叢入秋積雨忽生筍五株旬來森然成竹矣

時方移寓作詩志之

兩叢竹種庭南北土淺泥融尙露根暫借清陰障炎氣遽看穉節破苔痕人情
舊雨來賓客家信秋風報子孫

時大兒婦挈諸孫將至

珍重老夫臨別意歲寒冰雪不勝

繁

別雙槐四十韻

位置雙槐好空庭洽恰宜校三雖欠一得偶不成奇拂戶交垂處當窗並立時
遠疑孤幹合高被四鄰知匝匝重簷蓋舒舒五丈旗葉心還吐葉枝亞復抽枝
次第徐敷蔭縱橫各逞奇問年忘甲子稱老日期頤屈伏躄蹠獸深蟠偃蹇螭
藤輪銜宿瘤琴蚶斷炮皮晝聶輕煙蓄宵炕暗露披希間星或漏密布管難窺
蟬翳俄留蛻蟲來遽引絲啄枯巢有鵲撼大穴無虬日月東西照陰晴旦晚移
向來便嬾惰端賴拒炎曦張王貧官氣遮藏陋室基寓形粗當瓦取義合名移
步幃奢從設涼棚儉省支展鋪新笛簟抖擻敝書帷四角行攤飯中央坐賭碁
受風堪屏篔經雨爲添絺濃翠濡茶盞嬌黃墮酒卮愛花勤汎掃弄影故參差

忙闋名場速闕叨造化私桑榆收暮景蒲柳警秋姿物理循環具天心屈指推
稍聞聲械械旋見莢垂垂彼美真無度吾貪已不貲描摹虛畫手贊嘆少妍辭
但使居能久休論種自誰棟梁寧缺用節目亦奚施匠石慚頻睨樵斤幸勿斯
傲居初爲此覓地更何之跡在終漂梗神傷未解縻依回經宿戀搖蕩隔年期
晤對曾賓主吁嗟奈別離篋應難遂捨樹卽是相思鴻爪留齋笏蝸涎認履綦
後來須護惜看取壁間詩

敬業堂詩集卷三十八

敬業堂詩集卷三十九目錄

棗東集

移寓棗東書屋

同劉若干前輩汪紫滄錢亮功兩同

年登密雲縣鐘鼓樓

重陽密雲道中

樓敬思送菊

戲題吳寶崖杖頭貰酒圖小照

自題淳熙修內司官帖後

題蔣樹存繡谷圖為王石谷所畫

題顧天山南原讀書圖

再為樹存題王麓臺宮簷所畫蘇齋

圖

送張志尹前輩視學江南

杜大宗名維翰與余同舉順天鄉試三上春官不第而歿家素貧乏寡妻

秦稚子煢煢相倚十餘年矣今秋周桐桷視學畿輔拔其遺孤若馨入泮

馨貧未能娶因以族兄之女妻之作詩以紀兼示杜郎

陳乾齋前輩以院長兼領教習作述懷詩四章示館中諸君諷詠循環贊

歎不足輒次原韻奉簡

郊祀喜晴恭紀

周策銘前輩雪後入直武英疊院長四首韻見投感舊抒懷情詞斐疊再
次韻奉酬四首 嘉定譚生名在 欽取之列而外來

無咨送之文不獲赴書局辦事留余寓兩年將歸口占送之

奉送座主大宗伯許公 予告歸里五十韻

十二月十七日出阜成門重過苑西舊寓是日立春夜飲蔣西君同年筏

喻齋 謁座主相國澤州公於邸第見示

予告後新詩恭上二章 沈岱瞻同年餉寶坻銀魚

除夕與吳少融程蒿亭湯納時陸宮翎朱以靜湯公望家韜史小飲分韻

得懷字 辛卯人日赴座主澤州相國之召席

間公首倡七言律詩恭次原韻 送同年徐師魯出宰安陽二首

得石軒歌為汪千波兄弟賦 南海子四首

重經朱大司空花莊有感二首 廖若村同年屬題椿萱圖

清明雨 卽事

午亭山村座主相國澤州公里第也十五年前公官大司農時屬虞山王

暈繪成橫卷今從政府予告將歸上賜御書扁額公既作詩紀恩復

出此圖命慎行繼和恭賦七言絕句十二章

次韻答雲間黃若木三首
題陳緘菴前輩西溪探春圖二首

奉題座主宗伯公松下讀書圖四首

題李後圃鶴怨猿驚圖小照二首
老懶吟

張研齋前輩餉梅花片茶
盆池魚

送同年張耦韓宰靈寶
題同年徐師魯小照二首

師魯索題小照適飲藥酒微酣誤以爲撫琴圖率題五言絕句二首明日

視之乃烏皮几也再作二絕解嘲

牆西棗樹一株下無居人似爲余設也花時口占二絕

四月廿二日早赴西苑送
駕避暑幸山莊

科詔
卽事

病枕聞蟬

喜德尹至二首

喜雨

大雨中將入直東紅椒上人

種決明

六月十三日大雨獨坐武英殿書局

題汪千波清溪放艇圖二首

偶詠庭前花木五章

續詠庭前花草四章

吳文敷員外餉鮮荔枝憶戊寅六月

與竹垞先生同遊西禪寺飽啜此味慨然有作

翁蘿軒為西厓畫柳舍漁莊圖有詩索和次韻三首

西厓視學中州重修龍門香山寺後一年汪退谷以事入秦過洛中命主

僧種松數百株因繪成橫卷兩公往復之作在焉索余繼和四首

食鷄頭

以庭前新棗餉德尹二首

晒藥示紅椒上人

中秋赴座主澤州公之召公首唱七

律一章仰次原韻

席間遇兩相國復有留諸子待月之

作再次原韻

題王文選浣花溪垂釣圖小照二首

題表弟湯納時授經圖

王樓村同年忍冬齋賞菊分韻得頭

字十韻

次韻答東亭弟滇南見寄之作

武英殿書局告竣除夕口占

敬業堂詩集卷二十九目錄

...

...

...

...

...

...

...

...

...

...

...

...

...

...

...

...

...

...

...

...

...

...

...

...

...

...

敬業堂詩集卷三十九

海寧 查慎行 悔餘

棗東集

起庚寅八月盡
辛卯十二月

庚寅秋閏大兒婦攜諸孫將至槐移湫隘不能容乃遷居魏染衞衞西鄰
棗樹一本已纍纍垂實矣余下榻於東偏故名棗東書屋

移寓棗東書屋

一卷新編百首詩老夫昨日別槐移兒童上樹烏鳥樂正是鄰牆棗熟時

同劉若千前輩汪紫滄錢亮功兩同年登密雲縣鐘鼓樓

三面巍峨一面平亂峯如玦吐孤城望中禾黍開畿甸掌上風雲接帝京出塞
雙鵬盤遠勢入關萬馬壯秋聲夕陽樓下枯荻裏半截殘碑紀用兵

重陽密雲道中

過盡車聲十里岡牛欄山外作重陽黃花小店豐年酒紅樹遙村昨夜霜短鬢
愁侵新節序浮生知閱幾炎涼西風吹落參軍帽不是年時入塞裝

是日
自口外回

鑿

樓敬思送菊

老去逢秋愛晚香故人與致滿車黃
憐渠亦在風塵際置我居然籬落旁
折免

小鬟偷插鬢來如佳客快登堂
曾分一斗泉邊釀準備花時洗盞嘗

菊花易酒
北釀之佳

者夏初蒙院長見
餉尙未開壘也

戲題吳寶崖杖頭貰酒圖小照

新豐酒價逐年增笑爾粗豪老尙能
一醉徑須傾五斗百錢纔可博三升

自題淳熙修內司官帖後

淳化祖帖絕難得南渡摹勒傳淳熙
其詳載在輟耕錄官本舊推修內司
臨江

太媚絳潭瘦字體特取豐而肥

宋汪達閣帖辨記云其字
精明而豐腴比諸刻爲肥

曾經翻刻凡幾手亥

豕帝虎辨者誰形模粗具木偶爾神
理了不關須眉近來此本亦不易世
代漸

遠宋拓稀大觀之後此其亞僅與閣
帖爭毫釐有如虞夏祖顛頊要是嫡
派非

橫枝昨從廟中見且駭尤物乃落駟
僮兒裝褫仍用毬路錦十卷首尾完
無虧

叩之高索錢五萬而我囊乏三錢錐少需便恐被豪奪一計猛出居巢奇烏驢
充貨價相直快挾墨寶徒行歸入門爨婦告米罄一笑那顧朝來饑明窗小几
風日亮塵垢不敢侵吾帷古香透紙辟蟬蠹元氣入骨騰蛟螭熊異光黑點
漆滑滑膩理膚凝脂試臨只愁鬼掣腕旁睨幸免食朵頤嗟嗟世俗慣傳誤目
所未覩公謾欺曹家譜系格古論歲月舛繆餘可知曹士冕法帖譜系云淳熙
十二年乙巳二月十五日
撫勒上石曹昭格古要論云淳熙二年乙巳歲二月十五日修內司
模刻上石按今拓本乃十二年乙巳九月十一日當以拓本爲正 偶憑一端
爲駁證食古以耳皆如斯

題蔣樹存繡谷圖爲王石谷所畫

憶初訪君尋繡谷
泐緣棹轉闔門
曲桃花深鴈數千家
三徑依然蔣生獨到門
先看八分字
爪甲如龍陷蒼玉
恰當首夏候清和一色園林
雨新沐滿堂狂客
歡譁集詩酒衝筵事徵逐
曾蒙分韻強留題不怪歸舟避糟麴
別來塵土換顏
狀霜雪盈頭沾寸祿
我方寓直鄰浴堂君亦辭家赴書局
寒窗瑣細註蟲魚
十指排籤管鋒禿
此時忽漫披橫卷快若重遊爽心目
奉常筆法付宮端分派同

時一嘗熟精研往往到毫末縱逸寧容拘尺幅雲頭解駁天光開地脈盤旋風
氣蓄奇峯翠蹙龜山石高幄濃張洞庭木莎痕苔迹斷復連寬處編籬還補屋
漸深漸入窅無際中有千竿萬竿竹野老時拖拄杖來幽人自展遺書讀城端
殘照紅將斂遠勢投林鴉伴宿惜哉此景落東南欲往從之輿說輟畫圖非畫
乃真境試問歸期何日卜襍鞋桐帽吾豈無準擬相隨友麋鹿

題顧天山南原讀書圖

吳中多世家君豈瑛後人抱奇乃日富所得在一貧冰叟昔愛士門牆分彌親
我自識君來今幾三十春姓名達館閣蹤跡仍風塵磊落見高才激昂露天眞
深惟讀書力頤此遠俗神精理入毫銓古言闢菑榛兀然三尺几上與萬古鄰
糟醕殊少味願君飲其醇

再爲樹存題王麓臺宮詹所畫蘇齋圖

元四家法傳渺茫華亭一老誰頡頏我昨題詩諛石谷脈裔近遯婁東王朝來
復見宮相筆令我展卷喜欲狂君家繡谷中舊有交翠堂蘇齋想在交翠旁不

知結構幾時改但覺城西竹樹轉盼生輝光一丘與一壑一重復一掩似淺而愈深爲奇豈關險與酣揮灑如化工岩巒出沒初無窮能將萬里勢移入園亭中主人好事客不同三徑非復求羊蹤招邀笠屐作晤對尙友直到眉山翁樹存得東坡笠屐小像因築此齋屬麓臺圖之翁之來兮萬木風嶺海一氣遙相通當時買田陽羨歸未遂六百年後畫像乃落江之東麓臺麓臺真老手筆落神來洵非偶紀聞異日傳中吳繡谷名與蘇齋俱此圖此像他家無

送張志尹前輩視學江南

雙江西南來銅崖起何陡中流作砥柱萬馬盡回首先生生其間名望燦星斗決科上甲乙掇第聯子丑詞館服虛衷同官半師友讀書事默識呐呐不出口洪鐘扣則鳴傾倒靡不有高明本乎質器局隨所受公實狷者流貌和中有守平生取與分纖芥真不苟天子稔公賢臨軒簡端右量材今始用注意蓋已久江南往持衡緬維人文敷銀臺門下士君鄉試出西崖先生之門根柢視出手時會適

使然前車鑒諸後自從風教薄士習競趨走腦鹽爭一門日中有豐蔀情先絕

請託物自呈妍醜或虞節制尊文柄操賢否因之敵以下鬱鬱徒抱負坦懷吾
無蹊納約彼自牖方當前造膝胡慮旁掣肘率非公所難時論何足剖古來不
朽業要以精力取旌旄行出郊祖道缺卮酒片言聊贈別敬起爲公壽道在履
初爰素往義无咎

杜大宗名維翰與余同舉順天鄉試三上春官不第而歿家素貧乏寡
妻稚子勞勞相倚十餘年矣今秋周桐埜視學畿輔拔其遺孤若馨入
泮馨貧未能娶因以族兄之女妻之作詩以紀兼示杜郎

牧之京兆曾同舉稍長慚渠兄事余回首神傷三黜後過車腹痛十年餘獨留
病婦持家教能使孤兒讀父書今日兩家羊酒賀老槐猶認舊門閭

陳乾齋前輩以院長兼領教習作述懷詩四章示館中諸君諷詠循環
贊歎不足輒次原韻奉簡

重然藜杖照傳經光透文星是歲星鈴索自諳清氣味畫圖人識舊儀型

用白樂天

畫像集賢故事

波涵鯨海千層碧地拔鼇峯一朵青此日門牆稱最盛春風桃李屬頭

廳唐時翰林承旨所居名頭廳

北扉清切接延英一片臯比寄不輕半載岩廊虛左席六年林壑仰高情谷中吹律春長煖句裏探珠夜自明豈獨殊才歸領院雅輪當代荷扶藜

鸞鳳多出上林枝劉井柯亭有去思公望久推師表地人才況值 聖明時來

聽長樂鐘聲度起視花磚日影移法醞錦袍冬拜 賜太平故事在蓬池

經名千佛籍羣仙總藉文章與作緣冰署頭銜差耐冷玉成國器賴攻堅鸞坡地重官宜攝驥路風清駕獨先四首新詩代條教玉堂氣象一時還

郊祀喜晴恭紀

齋宮肅穆五雲端大祀 躬親不遣官閣道風清千步輦慶霄日麗九層壇陽和徧宇冬回律燿火升中曉辟寒天並 君王同霽色萬年歌頌溢鸞鸞

周策銘前輩雪後入直武英疊院長四首韻見投感舊抒懷情詞斐亶

再次韻奉酬四首

酒邊顛壘記曾經白戰詩成擬聚星甲戌冬新城先生座上徵雪事分題自入道山稱後輩每從

延閣想前型重來客鬢痕添白相對朝衫色總青劇喜歲寒同寓直不煩巡到

第三廳李濤乞酒詩惱亂玉堂將欲徧依稀巡到第三廳

人物他時數武英轉頭存歿感非輕傷松坪安公山堂三前申歸寅入餘書課

火冷香消付宦情粉蝕瓜牛粘壁燥氣吹野馬瞰窗明天公未放勞筋息幹合

弓膠且受繫

鳳條安穩舊栖枝出入頻深望闕思地異終南非捷徑羣空冀北已多時宣毫

在握才逾富江硯隨身榻未移十四年來翔步地後先鱗羽太差池此首敘先生重赴教

習廳事

縞衣昨夜舞羣仙冷淡閒坊醉少緣至日我偏愁晷短履霜誰與警冰堅寒寧

易就桑榆暖鴛豈能爭躩蹠先何法商量了官事便隨二老賦言還時座主相國陳公宗

伯許公相繼引年予告命下

嘉定譚生名在 欽取之列而外來無咨送之文不獲赴書局辦事留

余寓兩年將歸口占送之

知爾不能薦世情良可歎往年曾獻賦同輩盡彈冠近奉上諭各館纂書人員俱加恩議敘歲晚
獨行急家貧久客難向南冰雪少莫慮布衣寒

奉送座主大宗伯許公 予告歸里五十韻

六卿 予告吾鄉少此舉公今冠海寧秩領春官大宗伯光分南極老人星傳

家忠孝遙承緒得路煙霄早發矚瞻斗地崇依象魏搏扶力厚起鵬溟東流赴

壑隨川后西掌開山比巨靈質抱圭璋爭就琢文融金錫儼流型淮南子金錫不消釋則不

流紫淵欲涉迷津筏翠嶽難攀歎絕陁陁鶴禁向曾推舊學龍門誰不企高局容

臺洊歷非通職宰相他時待掃廳吐納心虛惟愛士交遊道廣總忘形絳紗夜

捲談經帳雲母朝排隔坐屏獨以潔身嚴漏室每持清議答明廷苞苴不入門

如水進退何慙戶亦銘正使含沙潛鬼蜮未妨擲瓦試清泠色寧可改緇加素

濁豈能侵渭別涇氣盛或滋曹耦忘言高偏徹 九重聽引年自據尚書禮唐孔

幾以禮部尚書據禮引年韓愈上疏留之事見唐書本傳 歷宦還符退傅齡白樂天詩官歷二十政宦遊三

三十年矣 鶚立雲端原矯矯鴻飛天外又冥冥頻聞入市蠅傳赦為報歸期鵲喜聆

率土三辰光禹服泰階五紀慶 堯冀行拋手板牙雙笏笑解腰圍帶萬釘海

外投竿連巨牯人間巢睫任焦螟宮聲緩應車前鐸塏語欣聞岸上鈴無跡可

求矜挂角忘機相對鶴梳翎行時楊柳風迎袖到日桃花浪泊汀羅雀閱情甘

寂寞烹鱸餘味取鮮腥主張泉石精神爽拂拭霧埃眼界青泮水西來開第宅

六峯幽處置林亭

破石梅會之交大小山
凡六竹垞會以名閣

舊栽松菊重移徑新茁芝蘭漸滿庭

兒是象賢齊謝鳳孫皆夙慧辨終誕昂藏駒目人千里珍重巾箱世一經鄰有

古風連橘枳巷無俗客駐筭篁許評字字榮華衰顏誥家家奉典刑物外衣冠

全洒落社中耆宿半凋零平生誼最敦花萼老去情尤感鶴鴿徧逮九宗多卹

睦近矧三眷少伶仃官貧并乏元紘馬業富猶餘武子螢何處追遊攜几杖偶

然乘輿出郊坰靜敲深院棋枰響醉問名園櫓窠停笛簟微颺涼過竹吟窗晴

旭煖穿櫺爐香馥馥分茶灶樹影離離上碓程童戴笠簪清入畫僕充耘耔健

添丁先生樂事行如櫛小子浮蹤寄若萍局躋伏轅踰弱歲衰遲起蟄及春霆

久知世路殊難騁屢夢田廬奈未醒心賞隨時勤造請耳提卽事發聾瞑飲醇

特許沾觴瀝饋食無由進土劔祖道逡巡思效駕守官悵類拘囚

昌黎詩守官類拘囚

白家池上尋芳屐戴氏溪邊泛雪舫華髮門生歸有約相期壽考頌椒馨

十二月十七日出阜成門重過苑西舊寓是日立春夜飲蔣西君同年

筏喻齋

多時不踏郊西路寓舍重來尙有鄰霜葉滿庭槐失蔭雪芽穿土薺先春孤蹤
易著棲遲客一宿猶煩洒掃人博得樽前開口笑白頭藩勝兩回新

謁座主相國澤州公於邸第見示 予告後新詩恭上二章

上章今始遂初衣五十餘年願不違老鶴林端排霧出高雲天上作霖歸別開
仙境爲詩境便息塵機入道機若論龍門原峻絕不因罷相客方稀
八載追隨在禁林奉公清誨識公心重編類上歸田集不比伊川擊壤吟流水
一彈真絕調朱絃三數有遺音管窺蠡測終難盡領味從人自淺深

沈岱瞻同年餉寶坻銀魚

濕薪爆竹歲將殘宦况聊同苜蓿盤三寸玉分良友餉一條冰合腐儒餐別中

加飯開魚素飽後投床夢釣竿無物報君還自笑近來詩語帶梅酸

東坡詩往
往亦帶梅

公酸謂
聖俞也

除夕與吳少融程蒿亭湯納時陸宮翎朱以靜湯公望家韜史小飲分

韻得懷字

藥爐新減兒曹病時兒建
病初起酒盞重開老子懷萬事過頭成舊曆一官嘗我似清

齋好吟畢竟為情累懶性殊難與俗諧倚賴諸君相煖熱隔鄰分火爇麻藍除夕

焚麻稽京
師風俗也

辛卯人日赴座主澤州相國之召席間公首倡七言律詩恭次原韻

重開東閣撰良辰喜入新年倍爽神句挾煙霞非俗韻坐談風月許門人黃封

例賜承 恩舊白社閒居致政新自此清遊好排日從公賞徧洛陽春東坡詩
華顛賞

徧洛
陽春

送同年徐師魯出宰安陽二首

掉臂飛騰籍甘心本分官八年需次及千里計程寬邑以名都劇人言簿領難

誰知游刃意只作小鮮看

門風卿相後棣萼盡龍媒東海承儒術中原展吏才清流泉百汭古跡鄴三臺
片瓦今難致煩君訪硯材

得石軒歌爲汪千波兄弟賦

行人學士兩詩伯兼抱元章好奇癖近因得石起軒名復以長篇誇示客軒西
舊是金張第臺榭居停凡幾易丈人閱世如老仙土蝕塵埋久遭厄時乎顯晦
豈天意不遇閔官誰愛惜偶憑鄰叟指牆隅試刷青苔開地脈雲根下插三十
年虹氣高騰二千尺聞雷隱隱動牙角出坎掀掀呈尾脊直疑井底養成龍不
信飛來化爲石君家院宇頗清曠添設闌干補籬柵長藤接葉樹交陰特欠懸
崖剖蒼壁移山之力十夫耳四片湖黿一朝獲清泉淨洗見真形衆竅玲瓏受
搜髻東西南北隨所置未覺中庭異寬窄花能含笑鳥能歌總向吟窗助搖蕩
醉眠大可當高枕雜座尤宜羅廣席吁嗟今人情賣菜爭求益疊巘層巒事堆
積周旋孰與一拳多乃至以身爲物役石然吾言應點首好共先生數晨夕試

問闕歸京兆亭

劉原父事見長安志

何如品入奇章宅

見白樂天太湖石記中

南海子四首

萬株楊柳密藏鴉苑戶如農不種花四百餘年飛放泊至今樵牧屬官家

纔過春分未禁煙畫橋冰釋溜涓涓清流愛照垂鞭影不賺人間飲馬泉

文園如山百物馴黃羊趨趨鹿牲牲生來便入雞豚隊臥草眠沙不避人

紅門草長少飛埃萬頃平疇掌上開一道修眉濃似畫近南遙識晾鷹臺

重經朱大司空花莊有感二首

載酒看花不計巡履綦陳跡愴城闔舊遊屈指誰還在我是當時末座人

蕭蕭宰木拱梧丘二十餘年奠醊休見說郎君頭雪白一官渾似謫江州

公子敬如

出守九江已二十二年矣

廖若村同年屬題椿萱圖

莊子紀大椿八千為春秋風人樹諼草北堂取忘憂物類致不齊寄託各有在

誰將女兒花

孟東野詩萱草女兒花

猥與丈人對後來遞相承用代父母稱雷同傳萬口

故事於何徵陟屺亦望父陟岵亦望母拘文恐害辭義可斷章取廖生我同年
天性實過人四十而孺慕有懷雙老親雙親從宦歸志未遂迎養所以仕於朝
時時深悵望晨昏難自慰作底承歡娛重將望雲意添寫椿萱圖誰非人子歟
此樂洵關命試問儕輩中幾家猶具慶

清明雨

九陌廉纖雨朝來阻鈿車擔頭春事好添種幾盆花

卽事

舊日兒童戲風鳶跋扈鳴近來雌蜺蝶栩栩鬪身輕

午亭山村座主相國澤州公里第也十五年前公官大司農時屬虞山

王翬繪成橫卷今從政府予告將歸上賜御書扁額公既作詩紀恩

復出此圖命慎行繼和恭賦七言絕句十二章

天井西來第幾陞浮嵐千里拱翠屏井西道人畫不得自有此山無此亭

萬丈光芒臨一州宸章奕奕垂銀鈎煙霞指點最深處中有御書縹緲樓

嵩少之旁多名園家山近繞申甫門丈人石踞天下脊三十六峯皆子孫
午壁午橋名偶同佳名豈襲裴令公屋頭山色屋下水多載桑經酈註中
他時物產按圖經見說長松似茯苓曾活萬人餘世澤天教仙草生槐庭
南陌東阡不斷雲瀧岡佳氣何氤氳行人過者日無數下馬來讀歐陽文
展卷尋常思釣遊太行天半阻歸輶誰知老鶴出羣意早在千花塢上頭
崦裏人疑小洞天如今真個著神仙蒼髯白甲問無恙已是歸遲十五年
幅巾藜杖去尋春盛事一時謹四鄰不獨公顏如雪柏亭旁竹樹多精神
澗澤灣濃走白沙一渠新漲給千家野翁邂逅勿相避丞相小車來看花
到眼風光涉筆成天然何必煩經營野桃官柳村村遍五畝不居獨樂名
一德君臣進退間恩深容易乞身還袖中攜得片雲去肯羨爲霖重出山

次韻答雲間黃若木三首

雅音日以遠里耳方好新凡卉擢穠華過眼同一春不有味古士誰歟範師民
任昉云師民之選允歸人範朝家宏網羅棫樸皆標薪人人珠在握一一鳳集身君豈躍冶

耶顧獨遺陶鈞不欲輕比擬擬之恐非倫

我初未識君聞君窺奧府平生不苟出厥德自藻斧竭來京洛遊黥則覲息補
居停得所託養此好毛羽昨者荷見存温温夙心吐深知君子性不逐時翔武
卽以詩學論自可立門戶

老年業不進少作悔子雲遷地胡能良鄭刀宋之斤幹才不自給何以揚英芬
官書日有課兀兀膏繼焚結習猥未除多生墜聲聞我惑歎滋甚君懷感彌殷
世豈無士安與序瑤華文

題陳緘菴前輩西溪探春圖二首

寶所塋邊松木場小溪冰泮綠泱泱竹篙撐到水窮處臘雪不香春雪香
不怕京塵漲帽裙參橫月落正思君何人喚醒羅浮夢萬壑千巖皆白雲

奉題座主宗伯公松下讀書圖四首

七旬過後便懸車八座歸來尙讀書不礙須髯銀樣白精神猶似入朝初
昨夢曾占十八公今於林下復相逢鄰翁笑指童童蓋此是先生手植松

晏晏濤生細細鱗喜從書裏著閒身腰金手板全拋却別換輕紗一幅巾
階庭蘭玉看初成萬卷傳家抵百城他日松風吹几杖執經猶有老門生

題李後圃鶴怨猿驚圖小照二首

晨鳧夜鯉烹殊僭春韭秋菘味最全此段風流君不乏故應慚愧督郵前

文人自古相輕薄不獨山陰孔稚圭我為解嘲還一笑絆將驥足展牛蹄

時李赴唐

縣任畫一牛車坐其中

老懶吟

筋駑肉緩嵇叔夜齒豁頭童韓退之自分我今兼二者那將老嬾逐兒嬉

張研齋前輩餉梅花片茶

摘得梅邊小瓣香雨餘出焙勝旗槍茶人預入前宵夢茗使旋分細色綱水態
花情論臭味鬢絲禪榻借風光開籠未敢輕煎點待淪清泉自在嘗

盆池魚

埋盆當小池中貯斗斛水紅鮮二三寸厥族殊鯽鯽粒晨飼之駢頭而接尾

居然樂同隊似識爭競恥江湖豈不寬吾力止於此含珠或望報一笑可以已
送同年張耦韓宰靈寶

地當分陝舊稱雄劇邑依然函谷東百里桑麻通號略一塍花柳界臨潼神明
世合推賢宰悃悞君能復古風別有高人占紫氣仙才寧滯簿書中

題同年徐師魯小照二首

琴調古於松琴心淡於水君勿改君絃吾方洗吾耳
林風吹月上下有涓涓瀨何處覓知音知音不在外

師魯索題小照適飲藥酒微酣誤以爲撫琴圖率題五言絕句二首明
日視之乃烏皮几也再作二絕解嘲

認將髹几作焦桐笑口重開展卷中道是醉人多謬誤終慚老眼太朦朧
松風水月與傳神何物能消簿領塵不待客嘲先自解畫中賴有抱琴人
牆西棗樹一枝下無居人似爲余設也花時口占二絕

童心預想三秋實吾眼聊看四月花見說西鄰曾去婦故來與爾作東家

獨樹移陰落檻前清香端為病夫傳斜街一榻槐花雨已是浮生過去緣憶槐

寓也

風木四月廿二日早赴西苑送駕避暑幸山莊

麥壠瓜疇曉氣温朦朦淡月漸無痕殘星帶火沈千點新綠如山擁一村老馬

熟諳城北路雛鶯又報苑東門征衣長短曾蒙賜篋笥三年倍感恩自入武英

書局三年免扈從矣

科詔

科詔重聞下大廷忿忿幾輩出郊垌冬烘一老粗知分閒臥天街閱使星余自乙酉

以來鄉會試應列銜名俱引分辭免

即事

盆池綠淨午晴初尺水中涵萬象虛一片玻璃天上下白頭影裏過遊魚

病枕聞蟬

閉門無剝啄倦枕閱晨暮風外一聲蟬誰家庭下樹

喜德尹至二首

近接元宵信添丁報玉川

第於元夕得子

重來堪一笑小別費三年賞酒逢花醉移床

聽雨眠城南數間屋相遲亦前緣

第所居即三年前舊寓也

六十吾過二君年正匝巡所傷非齒暮無愧是官貧骨肉性相近田園話倍真

舉家同旅食渾似帝鄉人

喜雨

六月黃塵裏炎蒸何處逃乍涼蟬嘒爽將雨燕飛高天意回枯槁人情散鬱陶
久醒思一醉連夜致香醪

大雨中將入直東紅椒上人

泥深路滑強肩輿童僕何由借蹇驢輸與城南詩老衲一爐香坐雨安居

印度僧徒

於五月十六後坐夏謂之坐雨安居以此時多雨也

種決明

眼昏欲試醫治

平聲

法庭下朝來種決明八廓五輪全是障

龍木論眼有五輪却八廓內外之障

思草木養餘生

六月十三日大雨獨坐武英殿書局

宛轉西城路衝泥入禁垣稍欣人語少故覺雨聲喧
螭吻劓雲黑龍頭吐水渾
微涼生殿閣沾洒亦君恩

題汪千波清溪放艇圖二首

三百八梯白岳四十七瀨清溪船頭已安茶具船尾可少偏提

載書我昨曾到老去重遊大難五百灘頭回首羨君搖艇新安
太白詩聞說金華渡東連五百

灘他年一攜手
搖艇入新安

偶詠庭前花木五章

茉莉本鬢華
佛書鬢華即茉莉也
南人不之重結籬雜枳棘爛熳寧煩種西江糧艘來此

物充土貢民間近亦夥廟市排缶甕一本值數千探支一月俸貧官俸有幾減

口為目用

秋葵特小草幹直葉頗剛鴨脚不中蔬移根自銅梁
韓偓黃蜀葵賦移根遠自於銅梁
經時得

土性伏雨回微涼一日閱一花半月如人長檀心暈深紫金瓊含嬌黃詩翁亦

何知輕比道家粧薛能黃葵詩記得玉人看
病後道家粧束厭穠時

棗實初如芡垂垂挂屋角秋陽一以曬脆美漸可支或慮壓枝低隔垣探掌握

家童方竊食遑問野鳥啄朝來風太狂響瓦若冰雹天公有暴殄靜者庶先覺

決明乃叢卉細莖挺蓬麻兔目葉如槐秋前吐黃花入秋況多雨亂發正復佳

勿矜顏色鮮行矣霜霰加吾方感獨立何暇為汝嗟少陵決明詩涼風蕭蕭吹
汝急恐汝後時難獨立

石榴八尺長灼灼花頭密火雲催落瓣秋蒂齊結實初看顆顆同罅拆謂可必

根孤力苦弱黃頽無虛日滋培吾豈殊成朽視其質何當慰老眼存者十之一

續詠庭前花草四章

木槿日及花難開易憔悴人情無久暫枯菀適時至數條自仲夏月令仲夏之
月木槿榮

荏苒雜秋卉老人齒髮衰閱世殊少味炎涼等晨暮草草寓生意

江南第一花山谷詩玉簪墜地無人
拾化作江南第一花得名獨因藥金方秉正色厥白孰與比愛

其玉無瑕持以配君子終焉忌太潔采摘從此始莫上美人頭膏油能污爾

海棠以秋名應候開最早媚人取顏色娟秀亦自好大葉承綠盤幽芳出紅襟
亭亭矜獨艷脈脈視羣槁春為耀眼花秋作斷腸草寄語賞花人千金須善寶
高梧葉旋殞苦竹歲不實九苞鳳德衰墜地尚仙質翩翩宜具體五綵爛初日
俗眼視如蓬紛紛難致詰稱呼隨世變愛惜從緣結誰知好女花可入毘耶室

吳文藪員外餉鮮荔枝憶戊寅六月與竹垞先生同遊西禪寺餉噉此

味慨然有作

不踏三山路於今十四年每談甘露味輒想荔支鮮好友能分餉浮生感宿緣

會同朱老喫惆悵望西禪

少陵詩果熟且同朱老喫

翁蘿軒為西厓畫柳舍漁莊圖有詩索和次韻三首

縹緲虛無外空明蕩漾前何從分筆墨直是散雲煙詩好原通畫神清果得仙
漁村楊柳岸放眼即湖天

宛轉橋臨渚參差樹隱莊棹應迷客入車或遣兒將命意何瀟灑為期但渺茫

兩三垂白叟篝火話溪堂

歸宿知何地披圖大可尋冷官疎熱客老境炯初心重碧千層浪遙青一寸岑
篋中無長物終不羨籛金

西厓視學中州重修龍門香山寺後一年汪退谷以事入秦過洛中命
主僧種松數百株因繪成橫卷兩公往復之作在焉索余繼和四首

俸薄官清舉廢難種松初返舊時觀風流二老知誰繼畫裏亭臺補復完

甲子俄驚十五周刹那滅劫已千秋自開成六年至今多情八節灘頭水重挾

松聲上石樓

曾否經堂認寫真却將綺語懺前塵他時編入支提藏莫忘題詩第四人兩公倡和

而外惟索西谷及余詩故云

夢裏曾遊亦勝緣鼎門南去是伊川打鐘掃地初心在終著袈裟喚渡船

食鷄頭

芡盤每憶家鄉味忽有珠璣入我喉絕勝嘗新會靈觀鷄頭池上剝鷄頭汁中芡實

出會靈觀歐蘇皆有詩京師德勝門內有鷄頭池當因此得名也

以庭前新棗餉德尹二首

已經半月申童約又剩高枝與鳥鷓比似洞天無核棗一枚聊解此生饒東坡云朱

明洞是蓬萊第七洞天有無核棗唐永樂道士侯大華以食棗仙去予在岐下亦得食一枚云

人間千樹等封君此語曾聞貨殖云好笑貧官貧徹骨一株還就比鄰分

晒藥示紅椒上人

故人憐吾衰往往致藥料王幼芬自蜀中貽黃連貝母附子鬱金湯西厓自遼東歸貽鹿膠五味子東西朔南產地

道悉精妙賤棄斬菅麻貴儲同美錄居然聚成肆巾笥蓄海嶠炮炙所未加蠹

叢劇牛噍幸辭梅雨漬喜及秋陽照連朝風色佳拓牖啓奧窅清泉滌宿垢緩

火焙瓦銚鼻觀通衆香薰然徹腦竅調柔在心性外物徒詭弔還復觀我身癡

愛於何召維摩經從癡有愛則我病生然而我有病此病非藥療自從客京塵四大苦纏繞

去聲攀援乃根本客疾從此黝齒落憐舌柔聲謹憎耳剽狂華瞥眼翳殘焰灰心

燒依回翦翮籠潑刺貪餌釣窮非學子諱痛甚舍人警近讀維摩經衰年忽如

少虛空一床座環顧不得傲芥子納須彌諸天初不覺大海入毛孔龜蠹性無

燒向來煩惱因摒擋付煙燎而今方丈室誓絕慈悲叫欲將藥施人恐被醫王笑

中秋赴座主澤州公之召公首唱七律一章仰次原韻

乘鸞顧兔望盈盈恍坐瓊臺第十成桂樹有香秋倍爽丹丘無月晝同明滿堂賓客沾餘暈前席生徒奉橋衡公視浮雲如富貴何煩問夜卜陰晴

席間遇雨相國復有留諸子待月之作再次原韻

子魚通印雀披綿不數侯鯖侈食前東閣再開延客地南樓重上晚涼天林泉興在何時遂風雨情深此夜偏兩串驪珠光照座賽看蟾魄十分圓

題王文選浣花溪垂釣圖小照二首

小舟閣淺沙巨石壓深澗忽動綠玻璃遊魚嚼花影
溪頭幾株桃多被柳拂開幽人此中坐簞笠青於苔

題表弟湯納時授經圖

與君中表序弟昆往還猶記隨家尊來時奉杖出候門長者前導幼踵跟聖童

十歲名早喧六經背誦河傾源我慚却立心自捫同年詎可同隊論爾來幾何
閱晨昏年踰六十手一反女長已嫁男已婚不獨抱子兼抱孫我雖竊祿鶴在
軒君猶需次羊觸藩夢歸往往得故園披圖相對兩悅魂君家紫雲山下村護
田之水清不渾有孫可教經可翻只坐入口艱饜飧絃歌三徑思所存桑榆力
挽扶桑暎黃精掃盡霜蓬根一笑重續兒童言

王樓村同年忍冬齋賞菊分韻得頭字十韻

晚菊多佳色書齋位置幽乍來寬束縛相對解綢繆冷偏精神透清宜臭味投
近盃浮藥氣照影出花頭肅肅霜如剪團團露欲流蟹胥黃剖殼鶴氅白披裘
籬下非無伴盆邊剩有秋酒徒謹復合詩主病初瘳莫以蹉跎數終能爛熳酬
年年高興在亦足慰淹留

次韻答東亭弟滇南見寄之作

西風萬葉催黃落鷺鳥盤空恣拏攫南中誰遣雁飛迴滿紙言愁嗟落魄我從
前夏與子別行坐時時感離索荒山亂水夜郎城憶走從軍恍如昨一身輕出

曾投筆萬里初歸但垂橐兵戈回首三十年烏道羊腸夢猶愕子今宦遊乃落
此恍惚披圖見滇略邪龍東徙窟宅清狂象南奔夷爨削浪穹水曳青羅帶點
蒼山淬芙蓉萼武侯故壘屹關城阿育遺封割岩壑鳴琴理訟三時暇傳鼓排
衙百吏諾才優官事非難了俗儉民情遙可度愁懷得酒且暫開詩體如騷亦
間作此間索米大不易應笑枯匏繫京洛性癖難陪冠蓋游興闌只想田園樂
馳書爲報天南弟待作癯仙同跨鶴

武英殿書局告竣除夕口占

窮年書課恰如期喜甚兒童放學時剩曆一行還餞臘涉冬三月可無詩舊巢
天上重來夢殘局燈前未了碁斑鹿黃牛仍拜 賜白頭慚愧被 恩私

前二日復

入南書房蒙 賜歲酒羊
鹿魚雉等物仍年例也

敬業堂詩集卷三十九